

四庫全書

經部

欽定四庫全書

經部

陸氏詩疏廣要卷上之上

詳校官監察御史臣左周

通政使司副使臣莫瞻菴覆勘

總校官知縣臣楊懋珩

校對官中書臣孫球

謄錄監生臣沈方大

欽定四庫全書

經部三

毛詩陸疏廣要

詩類

提要

臣等謹案毛詩陸疏廣要四卷吳陸璣撰明毛晉注  
晉原名鳳苞字子晉常熟人家富圖籍世傳影宋  
本多所藏收又喜傳刻古書汲古閣板至今流  
布天下故在明季以博雅好事名一時嘗刻  
津逮秘書十五集皆宋元以前舊帙惟此書

為晉所自編陸璣原本二卷每卷又分二子  
卷蓋儲藏本富故徵引易繁採摭既多故異  
同滋甚辨難考訂其說不能不長也其中如  
南山有臺一條則引韻書證其佚脫有集維  
鷗一條則引詩緝證其異同其考訂亦頗不  
苟至於嗜異貪多每傷支蔓如鶴鳴於九皋  
一條後附焦山瘞鶴銘考一篇蔓延及於石  
刻於經義渺無所關核以詁經之古法殊乖



體例然雖傷冗碎究勝空疎明季說詩之家  
往往簸弄聰明變聖經為小品晉獨言言徵  
實固宜過而存之是亦所謂論其世矣乾隆  
四十六年四月恭校上

總纂官

臣紀昀

陸錫熊

孫士毅

總校官

臣

陸費

墀



欽定四庫全書

陸氏詩疏廣要卷上之上

吳陸璣撰

釋草

明毛晉廣要

參差荇菜

荇一名接余白莖葉紫赤色正圓徑寸餘浮在水上根  
在水底與水深淺等大如釵股上青下白鬻其白莖以  
苦酒浸之脆美可案酒

一作肥美

爾雅云若接余其葉荇郭注叢生水中葉圓在莖端

長短隨水深淺江東食之亦呼茗鄭注今水荇也蔓  
鋪水上毛傳云后妃供荇菜以事宗廟埤雅曰參差  
荇菜左右流之三相參為參兩相差為差參差言其  
出之無類左右言其求之無方王文公曰萋餘詩雖  
以比淑女然后妃所求皆同德者則萋餘惟后妃可  
比焉其德行如此可以妾餘草矣若繁蘋藻所謂餘  
艸舊說藻華白荇華黃顏氏家訓云今荇菜是水悉  
有之黃華似蓴是也爾雅翼云本草云鳧葵即茗菜也

別本注駁之云苧菜生水中葉似蓴莖滋根極長江南人多食唐本云是猪蓴誤也猪蓴與絲蓴並一種以春夏細長肥滑為絲蓴至冬短為猪蓴亦呼龜蓴此與鳧葵殊不相似案苧菜今陂澤多有今人猶止謂之苧菜非難識也葉亦卷漸開雖圓而稍羨不若蓴之極圓也葉皆隨水高低平浮水上花則出水黃色六出今宛陵中陂湖中彌覆頃畝日出照之如金俗名金蓮子狀既似蓴又猪好食皆以小舟載取以

飼猪又可糞田或因是亦得猪蓴之名但非蓴菜耳  
陸德明曰天官醢人陳四豆之實無苢菜者以商禮  
詩詠時事故有之案風有采蘋采蘋又有采藻采芡  
采芹之屬水草甚多而醢人所薦止于昌本芡芹深  
蒲而已物之為苢蓋自有所宜餘或為芼羹之用豈  
可四物之外便謂商禮耶顏之推云苢先儒解釋皆  
云水草江南俗亦呼為蓴或呼為苢菜而河北俗人  
多不識之博士皆以參差者是苢菜呼人苢為人苢

亦可笑矣詩緝云參差訓不齊今池州人稱荇為  
荇公鬚蓋細荇亂生有若鬚然詩人之辭不苟矣  
按詩人取興荇菜以其柔順芳潔可羞神明也還重  
左右無方不流以興寤寐無時不求意況是時洽陽  
渭涘尚未造舟親迎何得便說到后妃薦荇以供祭  
祀埤雅直云后妃采荇諸侯夫人采蘋大夫妻采蘋  
藻固有次第尤為可笑王文公借接余舊名以為妾  
餘草近于戲矣

采采卷耳

卷耳一名泉耳一名胡泉一名苓耳葉青白色似胡荽  
白華細莖蔓生可嚮為茹滑而少味四月中生子如婦  
人耳中瑤今或謂之耳瑤草鄭康成謂是白胡荽幽州  
人呼爵耳

爾雅云卷耳苓耳郭註廣雅云泉耳也亦云胡泉江  
東呼為常泉或云苓耳形似鼠耳叢生如盤詩周南  
云采采卷耳鄭註舊說蒼耳非也此即卷菜葉如錢



細蔓被地本草曰梟耳一名胡梟一名地葵一名施  
一名常思生安陸川谷及六安田野實熟時採埤雅  
云爾雅曰卷耳苓耳廣雅曰即梟耳也幽州人謂之  
爵耳或曰形似鼠耳故有耳之號或曰白華細莖子  
如婦人耳璫故名荆楚記曰卷耳一名璫草亦云蒼  
耳叢生如盤詩曰采采卷耳不盈頃筐嗟我懷人寘  
彼周行言后妃持是罷采是物而不滿焉則以志在  
彼不在此也問者曰后妃貴矣今日采卷耳何也曰

是詩也非是之謂也詩人借此以寫后妃之志耳故  
曰說詩者不以文害辭不以詞害志以意逆志是為  
得之爾雅翼云卷耳菜名也幽冀謂之禮菜雒下謂  
之胡泉江東呼為常泉葉青白色似胡荽白華細莖  
可嚙為茹滑而少味又謂之常思菜儋人皆食之又  
以其葉覆麴作黃衣崔寔四民月令曰伏後二十日  
為麴至七月七日乾之覆以胡泉故古人采之卷耳  
之詩后妃志欲輔佐君子求賢審官知臣下之勤勞

先儒多異說蓋采采卷耳職之賤者淮南子稱瞽師  
庶女位賤尚莖權輕飛羽許叔重曰尚主也莖者莖  
耳菜名也主是官者至微賤也瞽師庶女復賤于主  
泉之官故曰權輕飛羽觀此則主泉之官位之微者  
周禮顧不可考或成周以前周南之官有之其實如  
蒼耳而蒼色上多刺好著人衣今人通謂之蒼耳其  
一名莖離騷以譬小人所謂蕢蕢莖以盈室是也一  
名羊負來博物志曰洛中有人入蜀胡泉著羊毛蜀

人種之曰羊負來也陶隱居乃云昔中國無此言從外國逐羊毛中來據此物既稱胡枲必是胡物但國風爾雅所載則其來已久而羊負來之名僅出後代則此名恐自洛入蜀者得之

按本草云卷耳一名菀離騷云葢菀菀以盈室兮王逸註曰菀枲耳也或又因爾雅卷施草謂即是菀郭氏以為宿莽引離騷夕擘洲之宿莽句第宿莽遇冬不死枲耳至秋早彫確是二物又按詩云卷耳爾

雅云蒼耳廣雅云梟耳皆以實得名第陸氏曰蔓生  
郭氏云叢生必當以郭氏為正

采采芣苢

芣苢一名馬舄一名車前一名當道喜在牛跡中生故  
曰車前當道也今藥中車前子是也幽州人謂之牛舌  
草可嚮作茹大滑其子治婦人難產

爾雅云芣苢馬舄馬舄車前郭注云今車前草大葉長  
穗好生道邊江東呼為蝦蟆衣邢疏云王肅引周書王

會云茅苴如李出於西戎王基駁云王會所記雜物奇獸皆四夷遠國各齎土地異物以為貢贄非周南婦人所得采是茅苴為馬舄之草非西戎之木也埤雅云神仙服食法曰車前之實雷之精也善療孕婦難產及令人有子故詩序以為婦人樂有子也列子曰若蠅為鶉得水為鱣得水土之際則為蠅蟻之衣生於陵屯則為陵舄陵舄車前也故或謂之蝦蟆衣韓詩傳曰直曰車前瞿曰茅苴蓋生於兩傍謂之瞿茅从艸从不苴从艸

从吕婦人樂有子或不或吕按艸最易生然他草所  
在或無惟車前蒼耳所至有之故芣苢卷耳之詩正  
言此二物本草云車前養肺強陰益精令人有子一  
名當道一名牛遺一名勝舄生真定平澤丘陵阪道  
中陶隱居云子性冷利仙經亦服餌之令人身輕不  
老韓詩乃言芣苢是木似李食其實宜子孫謬矣圖  
經云春初生苗葉布地如匙面累年者長及尺餘如  
鼠尾花甚細青色微赤結實如葶藶赤黑色今人五

月採苗七月八月採實又云地衣地衣者車前實也  
韓詩說云芣苢澤鳥也臭惡之菜詩人傷其君子有  
惡疾入道不通求已不得發憤而作以事興芣苢雖  
臭惡乎我猶採取而不已者以興君子雖有惡疾我  
猶守而不離去也

按爾雅及圖經諸書芣苢與澤鳥確是二種韓氏之  
誤甚矣況既云是木似李又云澤鳥何其自相背戾  
耶



言刈其萑

萑萑蒿也其葉似艾白色長數寸高丈餘好生水邊及澤中正月根芽生旁莖正白生食之香而脆美其葉又可蒸為茹

爾雅云購蔞萑郭鄭俱云萑蒿也生下田初出可啖江東用羹魚婢雅云蔞萑一名購莖高丈餘蒿屬其葉似艾白色初生可啖江東采以羹魚管子曰葉下于音輦輦下于萑萑下于蒲蒲下于葦葦下于藿藿下

于萋萋下于莽莽下于蕭蕭下于薜薜下于萑萑下  
于茅凡彼草物有十二衰爾雅翼云萋萋蒿說文曰可  
以烹魚今古以為珍菜大招云吳酸蒿萋不沾薄只  
王逸曰蒿蘼草也萋香草也蒿一作芼芼菜也言吳  
人善為羹其菜若萋味無沾薄言其調也又曰沾多  
汁也薄無味也言吳人工調醎酸燻蒿萋以為薺其  
味不濃不薄適其美也蓋萋多生于吳郭氏亦云江  
東用羹魚則吳人猶能調和之如後世千里蓴羹未下

鹽豉之比

于以采蘩

蘩皤蒿凡艾白色為皤蒿今白蒿春始生及秋香美可生食又可蒸食一名由胡北海人謂之旁勃故大戴禮夏小正傳云蘩由胡由胡旁勃也

爾雅曰蘩皤蒿郭氏鄭氏俱云白蒿又曰蘩菟葵又曰蘩由胡郭氏鄭氏俱云未詳疏云召南云于以采蘩毛傳云蘩皤蒿也郭氏云白蒿然則皤猶白也本

草云白蒿唐本注云此蒿葉麤于青蒿從初生至枯  
白于衆蒿欲似艾者所在有之又云葉似艾葉上有  
白毛麤澁俗呼蓬蒿可以為菹故詩箋云以豆薦繁  
蒻博雅云繁母茅茹也圖經曰白蒿蓬也生中山川  
澤今所在有之爾雅所謂繁皤蒿是也唐孟詵亦云  
生按酢食今人但食萋蒿不復食此或疑此蒿即萋  
蒿而孟詵又別著萋蒿條所說不同明是二物又今  
階州以白蒿為茵陳蒿苗葉亦相似然以入藥恐不

可用也埤雅云蒿青而高繁白而繁爾雅曰繁皤蒿一  
曰由胡廣雅云由胡白蒿也北海謂之旁勃夏小正  
曰繁由胡由胡旁勃也詩曰于以采繁于沼于沚繁  
所以祭也傳曰夫人執繁菜以助祭神饗德與信不  
求備焉七月之詩曰春日遲遲采繁祁祁傳曰采繁  
所以生蠶也今復蠶種尚用蒿云仙經曰白蒿白兔  
食之仙爾雅曰繁菟葵豈謂是歟爾雅翼云爾雅釋  
草曰繁之醜秋為蒿此大畧之言也又曰繁皤蒿此

指一物之言也故予以水草之繁為莪而皤蒿則此  
別說之皤蒿蓋今之白蒿也比青蒿而麤從初生至枯  
白于衆蒿春始生及秋香美可生食又可蒸以為菹甚  
益人故詩箋云以豆薦繁蒹然非水物故非召南所謂  
也春初此蒿前諸草生云可以生蠶蓋所以繁育庶物  
此物非惟生蠶又白兔食之而仙又駉驢亦食菴蘭  
子而仙駉驢馬類兔食繁駉驢食菴蘭物各有所宜  
本草又稱茵陳蒿白兔食之仙蓋茵陳似青蒿而背

白故說者誤以白蒿說之其苗細經冬不死更因陳  
根而生故名茵陳凡蘼之醜艾可灸者可占蕭可燎  
蓼我蒿蘼通可茹啖論者別而論之

按左傳云澗溪沼沚之毛蘋蘼蓼藻之菜可薦于鬼  
神可羞于王公必用水草者取其芳潔也據爾雅本  
草蘼即白蒿羅氏何云非水物余生澤國習見水草  
繁茂于陸地者不少然恒在洲渚澍涘間其根下滋  
于水故生耳嘗有荷花挺出于曲沼芳隄之上者將

亦謂之陸草耶

言采其蕨

蕨鼈也山菜也周秦曰蕨齊魯曰鼈初生似蒜莖紫黑色可食如葵

爾雅蕨鼈郭云廣雅云紫纂非也初生無葉可食江西謂之鼈邢疏云可食之菜也舍人曰蕨一名鼈鄭云今蕨芽也所在山谷有之埤雅蕨狀如大雀拳足又如其足之蹶也故謂之蕨俗云初生亦類鼈脚故



曰鼈爾雅翼蕨生如小兒拳紫色而肥詩及爾雅說  
文皆云蕨鼈也郭氏曰江西謂之鼈草木疏云周秦  
曰蕨齊魯曰鼈召南陟彼南山先蕨而後薇蕨薇蓋  
賤者所食爾今野人今歲焚山則來歲蕨菜繁生其  
舊生蕨之處蕨葉老硬敷披入誌之謂之蕨基通志  
云蕨一名鼈莽芽也四皓食之而壽夷齊食之而夭  
此物不可生食又有一種大蕨亦可食謂之蕨蕨爾  
雅云葍月爾陳藏器云今永康道江居民多以醋淹

而食之山谷詩云蕨芽初長小兒拳酷似其狀

言采其薇

薇山菜也莖葉皆似小豆蔓生其味亦如小豆藿可作羹亦可生食今官園種之以供宗廟祭祀

爾雅云薇垂水郭註生于水邊邢疏草生于水濱而枝葉垂于水者曰薇鄭註薇菜生水邊埤雅爾雅曰薇垂水好生水邊故曰垂水似藿菜之微者也微者所食故詩以采薇言戍役之苦而草蟲序于蕨後爾

雅翼薇垂水言生于水邊而召南之詩陟南山以采之故陸璣云山菜也又詩稱山有蕨薇而伯夷采薇于首陽山其歌曰登彼西山兮采其薇矣其後說者以為普天之下莫非王土食其土之所出即為之臣于是不食而死通志云白薇曰白幕曰薇草曰春草曰骨美又云薇生水旁葉如萍然詩云采薇者金櫻芽也胡明仲云荆楚之間有草叢生脩條四時發穎春夏之交花亦繁麗條之腴者大如巨擘剝而食之

甘美野人呼為迷陽疑莊子所謂迷陽迷陽無傷吾  
行即此名物疏云按本草薇有二種生平原川谷似  
柳葉者白薇也生水旁葉似萍者薇也詩云陟山采  
薇又云山有蕨薇則是山菜非爾雅所云垂水者也埤雅  
混而一之誤矣然陸璣稱莖葉如小豆蔓生璣親見  
官園所種所言必審復非似柳之白薇鄭漁仲謂是  
金櫻芽不知何據朱子胡氏皆以為迷陽而一云味  
苦一云甘美又自不同惟項安世以為今之野豌豆

蜀人謂之巢菜有合陸璣之疏

子以采蘋

蘋今水上浮萍是也其麤大者謂之蘋小者曰萍季春始生可糝蒸以為茹又可用苦酒淹以就酒

爾雅云萍萍其大者蘋郭璞云水中浮萍江東謂之藻邢昺云舍人曰萍一名萍大者名蘋鄭樵云萍浮萍也今謂之藻其大者蘋即萍類而大者按萍屬不可食此必蓴類葉亦圓浮水上如萍也本草云水萍

一名水花一名水白一名水蘇唐本注水萍有三種  
大者名蘋又有荇菜亦相似而葉圓小者水上浮萍  
吳氏云水萍一名水蕒陳藏器云蘋葉圓濶寸許葉  
下有一點如水沫一名芣菜爾雅翼云蘋葉正四方  
中折如十字根生水底葉敷水上不若小浮萍之無  
根而漂浮也故韓詩云沈者曰蘋浮者曰藻藻音瓢即  
小萍也蘋亦不沈但比萍則有根不浮游耳五月有  
花白色故謂之白蘋呂氏春秋曰菜之美者崑崙之

蘋藻焉蘋之極大者則有實楚王渡江有物觸王舟  
其大如斗而赤食之而甘孔子以童謠決之曰蘋實  
也雖皆萍之類然實蘋也非無根者所能生也又天  
問曰靡萍九衢言其枝葉分為衢道猶今言花五出  
六出也靡萍九衢異方之物故特奇偉今浮萍三衢  
蘋雖大四衢而已九衢而大于蘋則亦大蘋非特萍  
也又本草稱水萍亦謂此物陶隱居云非今浮萍子  
此三事皆得萍名而實蘋也故詳著之使覽者無惑

馬詩緝云蘋可茹萍不可茹郭氏以小萍為大蘋誤  
名物疏云按周處風土記萍蘋芥菜之別名此說非  
是芥別一物矣蘋又有水陸之異柳惲所謂汀洲采  
白蘋者水生而似萍者也宋玉所謂起于青蘋之末  
者陸生而似莎者也

按蘋可食萍不可食鄭樵疑之嚴粲駁之尚未詳析  
其狀後人未免傳譌然陸疏云小者曰萍原未嘗相  
溷埤雅釋蘋與藻互發反多糗糊處又釋萍云無根



而浮常與水平故曰萍也江東謂之漂言無定性漂  
流隨風而已周官萍氏掌水禁鄭氏云以不沈溺取  
名蓋使之幾酒謹酒也月令季春穀雨之日萍始生  
舊說萍善滋生一夜七子一曰萍浮于流水則不生  
于止水則一夕生九子故謂之九子萍也世說楊花  
入水為浮萍爾雅翼云水上小浮萍江東謂之藻高  
誘曰蘋大萍水漂也字並同皆以漂蕩之漂音簞瓢  
之瓢字似藻說者遂以相紊蓋非其類也說文云萍

無根浮水而生但有小鬚垂水中而已楚辭曰竊傷  
兮浮萍無根然淮南子云萍植根于水木植根于地  
蓋萍以水為地垂根于中則所垂者乃是根今或反  
根于上為日所暴即死是與失土同也二家釋萍極  
其詳明又與蘋有別但俱謂食野之苹即此物恐未  
必然名物疏云蘋有水陸之異甚確但陸生者亦不  
可如鄭氏意蘋為蓴類亦非

于以采藻

藻水草也生水底有二種其一種葉如雞蘇莖大如箸  
長四五尺其一種莖大如釵股葉如蓬蒿謂之聚藻扶  
風人謂之藻聚為發聲也此二藻皆可食鬻熟按去腥  
氣米麴糲蒸為茹嘉美揚州饑荒可以當穀食也饑時  
蒸而食之

爾雅云荇牛藻郭云似藻葉大江東呼為馬藻邢云  
以此草好聚生故言蒹藻鄭云水藻之類而葉差大  
生水底博雅云菱菜藻也

風俗通云殿堂宮室象東  
井形刻作荷菱水草以厭

火埤雅云藻水草之有文者出乎水下而不能出水之上其字从澡言自潔如澡也又云藻萍類似槐葉而連生生道旁淺水中與萍雜至秋則紫俗謂之馬藻亦呼紫藻故曰于以采藻于彼行潦而傳云聚藻也爾雅翼藻生水底橫陳于水若自澡濯然流水之中隨波行漾莖葉條暢尤為可喜故采藻于行潦也有二種其一種葉如雞蘇莖大如箸長五六尺其一種莖大如釵股葉如蓬蒿謂之聚藻橫被水下有自

然之文故古者象服有藻火之屬

藻取其潔

又畫于棧以

為飾亦以厭火

山節藻梲雖取其文亦以禳火今屋上覆檁謂之藻井亦曰綺井又曰覆

海又曰恩項

今鳧雁屬亦樂于藻故曰鳧藻楚辭曰鳧雁

皆唼夫梁藻是也

按陸氏云藻出乎水下而不能出水之上羅氏亦云

橫被水下則藻非浮者了然矣或因韓氏云浮者為

藻誤刻作藻遂謂藻亦出乎水上謬甚埤雅引呂覽

云藻之美者崑崙之蘋藻又引淮南子云容華生葉

藁生萍藻萍藻生浮草遂疑蘋即所謂藻又云非蒲  
藻之藻又云萍藻之藻浮蒲藻之藻沈總惑于浮沈  
之說遂誤認蘋藻為一物耳詩攷作予以采藻

白茅包之

白茅包之茅之白者古用包裹禮物以充祭祀縮酒用  
爾雅云蘧牡茅郭鄭俱云白茅屬

蘧音速

邢云茅之不

實者也一名蘧一名牡茅周易云拔茅茹以其彙征  
吉埤雅云茅之為物拔其根而牽茹者君子以類出

處之象又云藉用白茅无咎象曰藉用白茅柔在下也孔子曰茅之為物薄而用可重也禹貢云荊州厥貢苞匭菁茅吳錄地理志曰桂陽郴縣有青茅可染零陵泉陵有香茅古貢之縮酒合璧事類云茅叢生荒野間野人刈以覆屋江淮間生者一莖三脊曰菁茅

匏有苦葉

匏葉少時可為羹又可淹鬻極美揚州人恒食之至八

月葉即苦故曰匏有苦葉

郊特牲曰器用陶匏以象天地之性陶匏蓋取其質  
說文曰匏瓠也从包从夸聲包取其可包藏物也博  
雅匏瓠也埤雅長而瘦上曰瓠短頸大腹曰匏傳曰  
匏謂之瓠誤矣蓋匏苦瓠甘復有長短之殊定非一  
物也鵲冠子曰中流失舫一壺千金壺即匏也其性  
浮得之可以免沈溺故當失船之時其直千金也此  
亦如天竺涉水帶浮囊之類爾雅翼河汾之寶有曲



沃之懸匏焉良工取以為笙崔豹古今註曰匏瓠也  
壺盧匏之無柄者也瓠有柄曰懸瓠可為笙曲沃者  
尤善秋乃可用用則漆其裏匏在八音之一通典曰  
今之笙竽以木代匏而漆殊愈于匏荆梁之南尚存  
古制南蠻笙則是匏其聲甚劣則後世笙竽不復用  
匏矣匏既為樂器又以為飲器詩酌之用匏孔子稱  
繫而不食者良以待其堅而為用故也近世洪氏說  
以為天之匏瓜星天官星占曰匏瓜一名天雞在河

鼓東匏瓜繫而不食猶南箕不可以簸揚北斗不可以挹酒漿也按楚辭王褒九懷稱援匏瓜兮接糧曹植洛神賦曰歎匏瓜之無匹兮詠牽牛之獨處阮瑤止慾賦曰傷匏瓜之無偶悲織女之獨勤則古稱匏瓜皆謂星爾詩緝云匏經霜其葉枯落然後乾之腰以渡水名物疏云按廣雅說文古今註通云匏瓠也惟陸農師云長而瘦上曰瓠短頸大腹曰匏其兩形之別出于農師創見考諸書惟瓠甘匏苦為可明耳

然本草有苦瓠唐本註謂之苦瓠瓠復非瓠中之苦者瓠中之苦者疑是匏矣陸疏似以甘瓠為匏非也蓋瓠為總名甘者可食嘉魚稱甘瓠累之是也苦者佩以渡水此詩匏有苦葉是也入藥者名苦瓠瓠夏未始實秋中方熟取以為器經霜乃堪無柄者名壺盧七月稱八月斷壺是也有柄者懸瓠潘岳云河汾之實是也小者名瓢食之勝瓠陶貞白所言是也細腰者名蒲盧淮南子云百人抗浮是也

采葍采菲

葍蔓菁一作蕪青幽州人或謂之芥菲似菹莖麤葉厚而長有毛三月中蒸鬻為茹甘美可作羹幽州人謂之芴爾雅又謂之蔥菜今河內人謂之宿菜

葍爾雅云須葍葍

郭云未詳鄭云菰葍也積舊莖頭而成封者

又云須葍

蕪

郭云似羊蹄葉細味酢可食鄭云一名葍即蔓菁也

邢疏云案詩谷風云采

葍采菲毛傳云葍須也先儒即以須葍葍當之孫炎云須一名葍葍今郭註上葍葍云未詳註此云葍蕪

似羊蹄葉細味酢可食則郭意以毛云葑須者謂此  
葑蕒也坊記註云葑蔓菁也陳宗之間謂之葑方言  
云鹽菹蕒蕒也陳楚謂之鹽齊魯謂之蕒關西謂之  
蕒葑趙魏之郊謂之大芥鹽與葑字雖異音實同則  
葑也須也蕒葑也蔓菁也葑蕒也菹也芥也七者一  
物也本草云蕒葑味苦圖經云蕒葑四時仍有春食  
苗夏食心亦謂之葑子秋食莖冬食根河朔尤多種  
可備饑歲常食之通中益氣令人肥健南人取北種

種之初年相類至二三歲則變為菰矣埤雅菰性陵冬不彫四時常見有松之操故其字會意而本草以為交耐霜雪也舊說以菰菜北種初年半為蕪菁二年菰種都絕蕪菁南種亦然蓋菰之不生北土猶橘柚之變于淮北矣蕪菁似菰而小有臺一名對一名須爾雅須葢蕪也今俗謂之臺菜其紫華者謂之蘆葍一名菜葍所謂溫菰是也菜葍言來麤之所服也爾雅翼云蔓菁南北通有之北土種之尤多菜中之

最有益者塞北并汾河朔間燒食其根呼為蕪根猶  
是蕪菁之號昔漢桓帝永興中令災傷郡國皆種蔓  
菁以助民食劉備歸曹公公使覘之閉門將人種蔓  
菁而諸葛亮所止令軍士獨種蔓菁者取其纔出甲  
可生啖一也葉舒可鬻食二也久居則隨以滋長三  
也棄不令惜四也回則易尋而采之五也冬有根可  
劖而食六也三蜀江陵之人今呼為諸葛菜蔓菁根  
葉及子乃是菰類與蘆葍全別陶隱居言其子與蘆

菰相似魚言小葦故說者疑江表不產注失其真耳  
有人將菰菜北種初一年半為蕪菁二年菰種都絕  
將蕪菁子南種亦二年都變其子亦隨色變大率菰  
子黑蔓菁子紫赤大小相似蘆菰子黃赤而大又不  
圓也亦梗長葉瘦高者為菰葉濶厚短者為蕪菁詩  
緝云江南有菰江北有蔓菁相似而異周禮醯人菁  
菰鹿藿註菁蔓菁也急就章曰老菁叢荷冬日藏按  
禹貢荊州包匭菁茅孔子曰菁以為菰呂氏春秋亦



曰菜之美者具區之菁則菁之見貴舊矣然說者或以菁茅為茅之名而言老菁冬藏者為韭花云今蔓菁園中無蜘蛛是其所畏也南都賦秋韭冬菁註曰韭其華謂之菁

菲爾雅云菲芴

郭鄭俱云即土瓜也

又云菲蔥菜

郭云菲草生下濕地似蕪

菁華紫赤色可食鄭云蔥菜即蓬菜也

邢疏云菲一名芴郭云土瓜也

孫炎曰菹類也詩谷風云采芴采菲陸璣云菲似菹莖麤葉厚而長有毛三月中蒸鬱為茹甘美可作羹

幽州人謂之芴爾雅又謂之蔥菜今河內人謂之宿  
菜案今爾雅非芴與蔥菜異郭註似是別草如陸之  
言又是一物某氏註爾雅二處皆引谷風詩即菲也  
芴也蔥菜也土瓜也宿菜也五者一物其狀似菑而  
非菑故云菑類也

按爾雅疏云葍也須也蕪菁也蔓菁也葍蕪也菑也  
芥也七者一物也考爾雅又云葍從方言又云鹽圖  
經云臺子共得十名至若河朔呼為蕪根塞北呼為

九英蜀呼為諸葛菜隨俗異名不可勝記但菰與蔓菁南北互變實是一種蘆菔確是二物不知子雲何以云然

誰謂荼苦

荼苦菜生山田及澤中得霜甜脆而美所謂董荼如飴內則云濡豚包苦用苦菜是也

爾雅云荼苦菜郭註云詩曰誰謂荼苦苦菜可食鄭註云生山谷味苦今人呼苦益邢疏云此味苦可食

之菜一名荼一名苦菜本草一名荼草一名選一名游冬案  
易緯通卦驗玄圖云苦草生于寒秋經冬歷春乃成  
月令孟夏苦菜秀是也葉似苦苣而細斷之有白汁  
花黃似菊堪食但苦耳博雅云游冬苦菜也埤雅云  
荼苦菜此草凌冬不彫故一名游冬時訓解云小滿  
之日苦菜秀苦菜不秀賢人潛伏儀禮云鉶芼羊苦蜀  
本圖經云春花夏實至秋復生花而不實經冬不彫  
衍義云苦菜四方皆有在北道則冬方凋敝在南方

則冬夏常青葉如苦苣更狹其綠色差淡味苦花與  
野菊似春夏秋皆旋開花詩緝云經有三茶一曰苦  
菜二曰委葉三曰英茶此詩誰謂荼苦及唐采苓采  
苦采苦繇董茶如飴之荼皆苦菜也良耜以薺茶蓼  
之荼委葉也鄭出其東門有女如茶英茶也鷓鴣子  
所將茶傳云萑苕疏云亂之秀穗亦英茶之類

按朱傳云蓼屬謂此茶與良耜以薺茶蓼之茶同似  
不可從嚴華谷辨之甚詳但以將茶為英茶之類恐

未必然

言采其蟲

蟲今藥草貝母也其葉如栝樓而細小其子在根下如芋子正白四方連累相著有分解也

爾雅茵

音萌

貝母註云根如小貝圓而白華葉似韭疏

云藥草貝母一名茵今常用之藥出近道形似聚貝子故云貝母本草云一名空草一名藥實一名苦花一名商草一名勤母能散人心胃鬱結之氣殊有功

詩云言采其蟲是也圖經云根有瓣子黃白色二月生莖細青色葉亦青似蕎麥葉隨苗出七月開花碧綠色形如鼓子花八月採根晒乾又云四月蒜熟時採之良

菜竹猗猗

有草似竹高五六尺淇水側人謂之菜竹也菜竹一草名其莖葉似竹青綠色高數尺今淇澳傍生此人謂此為綠竹淇澳二水名

菴爾雅云菴王芻郭云菴蓐也今呼鷓鴣脚莎其氏云  
鹿蓐也鄭云薑草亦名菴蓐本草唐注云薑草葉似  
竹而細薄莖亦圓小生平澤溪澗之側荆襄人鬻以  
染黃色極鮮好洗瘡有效爾雅所謂王芻爾雅翼云  
說文曰菴王芻也引詩曰菴竹猗猗則綠與菴同本  
草名薑草俗亦呼淡竹葉所謂終朝采綠不盈一掬  
者上林賦稱香草云揜以綠蔥被以江蘿張揖亦以  
綠為王芻衛風引以為首蓋必嘉草也而離騷云資



菴菴以盈室兮判獨離而不服以三者皆惡草與衛  
風相反詩騷所取各有義耳

竹爾雅云竹篇蓄郭註似小藜赤莖節好生道傍可  
食又殺蟲李巡曰一物二名也孫炎某氏引詩衛風  
云菴竹猗猗案陶隱居本草註云處處有布地而生  
節間白華葉細綠人謂之篇竹嚮汁與小兒飲療蛇  
蟲鄭注即篇竹也韓詩綠薄猗猗薄篇筑也陸德明  
曰薄篇竹也石經同篇竹亦作扁竹蜀本草云葉如

竹莖有節細如釵股生下濕地圖經云春中布地生  
道旁苗似瞿麥葉細綠如竹赤莖如釵股節間花出  
甚細微青黃色根如蒿根爾雅翼云九章曰擘大薄  
之芳蒨兮搴長洲之宿莽惜吾不及古之上兮吾誰  
與玩此芳草解篇蓄與雜菜兮備以為交佩王逸曰  
言已解折篇蓄雜以香菜合而佩之脩飾彌盛也然  
篇蓄雜菜皆非芳草逸義非是蓋言解去篇蓄與雜  
菜而佩芳蒨宿莽為交佩爾然則竹又惡物與衛風

相反耶又云篇蓄既似竹則宜謂之竹爾按璣所說則又合綠與竹為一草未知其審然古今說者皆言淇水旁自生竹箭故古人言伐竹淇衛又曰淇衛之箭如此多矣蓋淇水宜竹箭自古已然然說文引詩作菴竹韓詩作綠薄菴既非色而薄又非竹不可合為綠色之竹箭故析而解之云菴王芻薄篇筵也然則淇澳自出竹箭不妨兼有菴竹二草耶

綠竹朱傳云綠色也淇上多竹漢世猶然所謂淇園

之竹是也竹譜云淇園衛地殷紂竹箭園也淮南子  
曰烏號之弓貫淇衛之箭毛詩云綠竹猗猗是也又  
云植物之中有物曰竹不剛不柔非草非木或茂沙  
水或挺巖陸又云竹之別類六十有一又云竹六十  
年一易根輒結實而枯死其實落地復生六年遂成  
疇埤雅云竹物之有筋節者也故蒼史制字筋節皆  
從竹爾雅曰東南之美者有會稽之竹箭焉今竹性  
亦喜東南引生故古之種法云劓取東南引根于園

角西北種之久之自當滿園語曰西家種竹東家治地言其滋引而生來也易曰方以類聚竹引東南則以卦推之巽為竹矣震東方也故震為蒼筤竹而已蒼筤幼竹也傳曰淇衛箊簞又曰淇衛之箭又曰下淇園之竹以為棣伐淇園之竹以為矢蓋淇之產竹土地所宜故風人以此美武公之德也詩云瞻彼淇澳綠竹猗猗瞻彼淇澳綠竹青青竹之初生其色綠長則綠轉而青矣卒章又曰如箊言盛也則又明其

為竹矣說文竹冬生草也圓質虛中深根勁節其種大小不一字從倒艸竹艸也而冬不死故從倒艸

按綠一作菴王芻也竹一作薄菴蓄也毛韓說皆同而竹譜朱傳皆以為即漢書淇園之竹酈道元云淇川無竹惟王芻菴草不異毛興劉執中云淇水之旁至今多美竹豈淇園之竹在後魏無復遺種而至宋更滋茂乎然據兩漢書淇澳有竹據水經注有王芻菴草毛韓朱三家各自可通陸璣又以綠竹為一草

名古今並無從其說者今木賊艸醫方通用木工以  
治器但無華葉寸寸有節與陸說有葉者稍殊未知  
即一物否也爾雅釋蕩芥等在草中然實非草類王  
元美所云竹于草木如魚于鳥獸是也其類至多山  
海經帝俊竹共谷竹鉤端竹尋竹禮斗威儀蔓竹吳  
越春秋晉竹述異記斑竹孤竹孝竹呂覽解谷竹南  
都賦鐘籠篁篋篠簞簞吳都賦篋簞林筵桂箭射  
筒袖梧篋簞竹譜單名者衛篋棘單苦甘弓筋筇當

節簞蓋狗蘆簞之屬雙名者蘇麻般腸百葉雞脰簞  
篠之屬廣志有雲母櫛篋漢利之屬酉陽雜俎有筍  
簞之屬筍譜至八十五種竹筍及諸方志有疎節人  
面縣貓叢澁碧玉電斑之屬難以具載然多出交廣  
荒外非詩人所盡見也竹田曰簞竹胎曰筍竹膚曰  
篴竹皮曰筠竹裏曰笨竹枚曰箇竹約曰節剖竹未  
去節曰籜竹死曰筴竹有雌雄雄者多筍五月十三  
日謂之竹醉日栽竹多茂盛其性惡寒好溫故曰九



河鮮育五嶺實繁然處處有之不似篇蓄但盛于淇  
川也上文皆馮嗣宗辨證可謂詳明博雅矣但遍搜  
陸疏刻本並未載木賊惟馮本多其草澁礪可以洗  
攪笏及盤枕利于刀錯俗呼為木賊數語因多木賊  
草一辨然木賊產于秦隴間不聞產于淇衛未知昔  
人何以云然

芄蘭之支

芄蘭一名蘿摩幽州人謂之雀瓢蔓生葉青綠色而厚

斷之有白汁鬻為茹滑美其子長數寸似瓠子

爾雅云藿芄蘭邢氏云藿一名是芄蘭郭云藿芄蔓生斷之有白汁可啖案如此註則以藿芄一名蘭或傳寫誤芄衍字詩衛風云芄蘭之支鄭氏云即蘿摩菜蔓生斷之有白汁可啖箋云芄蘭柔弱恒蔓于地有所依緣則起沈括曰芄蘭之支支莢也芄蘭生莢支出于葉間垂之如觴狀其葉如佩韞之狀

按說文說苑石經俱作芄蘭之枝許慎云枝木別生

枝條也

中谷有推

推似荏方莖白華華生節間舊說及魏博士濟陰周元明皆云蒼蘭是也韓詩及三蒼說苑云推益母也故魯子見益母而感按本草云荒蔚一名益母故劉歆曰推臭穢即荒蔚也

爾雅云荏推郭璞曰今荒蔚也葉似荏方莖白華華生節間廣雅云又名益母本草經云荒蔚子一名益

母一名益明一名大札一名負蔚生海濱池澤圖經云今園圃及田野見者極多形色皆如郭說而苗葉上節節生花實似鷄冠子黑色莖作四方稜衍義云荒蔚子葉至初春亦可鬻作菜食凌冬不凋悴陳藏器云此草田野間人呼為鬱臭草外臺秘要云益母草一名負澹子一名夏枯草三月採治產婦諸疾神妙故曰益母埤雅曰荒蔚一名蔚臭一名雅詩曰中谷有雅曷其乾矣旱乾曰曷雅者能曷之草今曰曷

其乾矣則非一日之亢也故序以為凶年饑饉室家  
相棄李巡曰臭穢草也傳云推離也名物疏云毛傳  
云推離大車傳云莢離考本草諸書荒蔚子並無離  
名豈毛以推為莢乎毛又云陸草生谷中傷于水據  
本草荒蔚正生海濱池澤非陸草也魏博士等以為  
菴藺本草菴藺生雍州川谷及上黨道邊春生苗葉  
如艾蒿高三二尺七月開花八月結實亦無推名不  
知古人何以云爾

按雅離菴蘭異種名物疏辨之甚核余意毛傳之誤

爾雅雀字誤之也

但据說文从艸从隹朱惟切草屬即此爾雅雀菴也

者即八月雀菴之雀也从艸从隹者胡官切隹屬也首既不同因有三音今从俗混作一字

朱注

亦云離也又云葉似雀不惟傳訛且兩岐矣至如夏

枯草一名鬱臭因入夏即枯故名別是一種經中所

不載陳藏器及外臺秘要混以為雅獨不見雅草夏

間始著花何云枯耶但花有紫白二種陳藏器以白

花者為是孫思邈以紫花者為是李時珍又云二色

皆是白花者主氣分紫花者主血分如牡丹芍藥有紅白之類

隰有游龍

游龍一名馬蓼葉麤大而赤白色生水澤中高丈餘

爾雅云紅龍古其大者歸郭註俗呼紅草為龍鼓語轉耳毛云龍紅草也鄭註亦云紅草也似蓼而高大多毛故謂之馬蓼本草經云紅草一名鴻薦如馬蓼而大生水旁五月採實陶隱居云此類極多今生下

濕地極似馬蓼甚長大圖經云紅草即水紅下濕地  
皆有之葉大赤白色高丈餘詩隰有游龍是也陸璣  
云一名馬蓼本經云似馬蓼而大若然馬蓼自是一  
種埤雅龍紅草也一名馬蓼莖大而赤生水澤中高  
丈餘詩曰隰有游龍游縱也以縱故謂之龍爾雅翼  
龍紅草也一名馬蓼葉大而赤白色生水澤中高丈  
餘今人猶謂之水紅草而爾雅又謂之龍古鄭詩隰  
有游龍云游龍者言枝葉放縱也



按本草衍義云水蓼與水紅相似則龍非蓼可知但諸書未有詳其花色者惟陸佃釋蓼云又一種木蓼一名天蓼蔓生葉如柘花黃白子皮青滑其最大者名龍已見別章蓋指此管子五位曰其山之淺有龍與井按五位之土上土也龍始生焉或不若諸蓼之下濕皆有與

茹蘆在阪

茹蘆茅蒐菴草也一名地血齊人謂之茜徐州人謂之

牛蔓今圃人或作畦種時故貨殖傳云庖菑干石亦比  
千乘之家

爾雅云茹蘆茅蒐郭鄭俱云今之菑也可以染絳本  
草菑根可以染絳一名地血一名茅蒐一名菑蜀本  
圖經云染絳草葉似棗葉頭尖下濶莖葉俱澁四五  
葉對生節間蔓延草木上根紫赤色今所在有八月  
採根陳藏器云周禮庶氏掌除蠱毒以嘉草攻之嘉  
草蘘荷與菑主蠱為最爾雅翼云說文曰茹蘆人血

所生故一名地血茅蒐染韋一入為韎詩曰韎韐有  
奭左傳韎韐之跗注是也其女子之染則毛氏云茹  
蘆茅蒐之染女服也鄭箋云茅蒐染巾也則縞衣茹  
蘆為婦人服矣齊人謂之蓍蓍或作茜漢書千畝厄  
茜其人與千戶侯等是也今人染蓍者乃假蘇方木  
非古所用

方秉蘭兮

蘭即蘭香草也春秋傳曰刈蘭而卒楚辭云紉秋蘭以

為佩孔子曰蘭當為王者香草皆是也其莖葉似藥草  
澤蘭但廣而長節節中赤高四五尺漢諸池苑及許昌  
宮中皆種之可著粉中故天子賜諸侯萐蘭藏衣著書  
中辟白魚

埤雅蘭香草也而文闌艸為蘭蘭闌不祥故古者為  
防刈之也一名簡有蒲與簡蓋蘭以闌之簡以閒之  
其義一也傳曰德芬芳者佩蘭古之佩者各象其德  
楚辭所謂紉秋蘭以為佩是也疏云藏之書中辟白

魚故古有蘭省芸閣芸亦辟蠹詩曰溱與洧方渙渙  
兮士與女方秉蘭兮言鄭人會于溱洧兩水之上秉  
蘭以自祓除其風俗之舊也及其甚也淫風大行過  
時而不反來者日益以衆序所謂莫之能救者也淮  
南子曰男子樹蘭美而不芳說者以為蘭女類也故  
男子樹之不芳夫草木之性蘭宜女子樹之本草經  
云蘭草主殺蟲毒辟不祥久服輕身不老一名水香  
生大吳池澤澤蘭生汝南諸大澤旁圖經云澤蘭與

蘭草相類但蘭草生水旁葉光潤根小紫五六月盛  
澤蘭生水澤中及下濕地葉尖微有毛不光潤方莖  
紫節七八月初採微辛此為異耳爾雅翼蘭今之蘭  
草都梁香也盛弘之荊州記曰都梁縣有山山下有  
水清淺其中生蘭草因名都梁因山為號其物可殺  
蟲毒除不祥故鄭人方春之月於溱洧之上女士相  
與秉蘭而祓除因以淫泆韓詩云今三月桃花水下  
以招魂續魄祓除氛穢又周禮女巫歲時祓除豐浴

鄭氏云今三月上巳水上之類疊浴以香藥薰草沐  
浴然則用蘭可知矣陸氏所說皆是惟引以解左傳  
楚辭之蘭為非矣又云蘭是香草之最而古今沿習  
但以蘭草當之陸璣解溱洧所秉之蘭以為蘭耶劉  
次莊說樂府又引離騷秋蘭兮青青綠葉兮紫莖以  
為沅澧所生花在春則黃在秋則紫春黃不若秋  
紫之芳馥二家之說皆是蘭草一名都梁香一名  
水香以之解秉蘭可也何闕古之所謂蘭乎予生江

南所見甚熟蘭之葉如莎首春則茁其芽長五六寸其杪作一花花甚芳香大抵生深林之中微風過之其香藹然達于外故曰芝蘭生于深林不以無人而不芳故稱幽蘭與蕙甚相類其一幹一花而香有餘者蘭一幹五六花而香不足者蕙今野人謂蘭為幽蘭蕙為蕙蘭其名不變于古然江南蘭只在春芳荆楚及閩中者秋復再芳故有春蘭秋蘭至其綠葉紫莖則如今所見大抵林愈深而莖愈紫耳近世惟黃



太史豫章人說蕙蘭合此餘皆蘭草蘭草生水傍非  
深林之物又稱紫莖而解以紫花皆非其理矣左傳  
鄭文公妾名燕姑夢天與蘭且曰蘭有國香人服媚  
之文公遂與之蘭而御之生子穆公名蘭內則曰婦  
或賜之茝蘭則受而獻諸舅姑此蘭女事故一名女  
蘭夏小正云五月畜蘭為沐浴也陳藏器云蘭草婦  
人和油澤頭故曰澤蘭

凡蘭皆有一滴露珠在花蕊間謂之蘭膏不啻沆瀣李長

吉云幽蘭露如啼眼無  
物結同心烟花不堪剪

按孔子云蘭為王者香草江南人以蘭為香祖又云  
蘭無偶稱為第一香但爾雅獨不載不解何故蘭之  
種甚多如竹蘭石蘭伊蘭崇蘭風蘭鳳尾蘭玉柱蘭  
珍珠蘭之類不可枚舉凡吳越閩粵荆楚間皆有之  
或產于幽谷或產于深溪無論土人莫辨其品類即  
陶隱居鄭漁仲輩亦未免指鹿為馬矣羅氏以陸氏  
誤引左傳楚詞辨之似得其實第毛氏及張揖諸家  
俱云蘭蘭也羅氏以為蘭草未知確否或又詳辨澤

蘭與簡是二物關陸氏之誤且陸氏云似澤蘭何嘗  
認為一種觀埤雅蘭以闌之簡以閒之二語深得古  
人被除之意當年鄭俗淫蕩焉知不因燕姑一夢士  
女爭相秉簡耶 王氏詩攷異字異義作方秉管兮  
不知何解

贈之以芍藥

芍藥今藥草芍藥無香氣非是也司馬相如賦云芍藥  
之和揚雄賦曰甘甘之和芍藥之美七十食之

廣雅云擘夷芍藥也本草云一名白木一名餘容一名犁食一名解倉一名鋌生中岳川谷及丘陵圖經云春生紅芽作叢莖上三枝五葉似牡丹而狹長高一二尺夏開花有紅白紫數種子似牡丹而小秋時採根根亦有赤白二色古今註曰芍藥有二種有草芍藥木芍藥木者花大而色深俗呼為牡丹非也又牛亨問曰將離別相贈以芍藥者何答曰芍藥一名可離故相贈猶相招召贈以文無文無一名當歸也

欲忘人之憂則贈以丹棘丹棘一名忘思使人忘憂也欲蠲人之忿則贈以青裳青裳一名歡合則忘忿也山海經條谷之草多芍藥洞庭之上多芍藥埤雅芍藥榮于仲春華于孟夏傳曰驚蟄之節後二十有五曰芍藥榮是也花有至千葉者俗呼小牡丹今羣芳中牡丹品第一芍藥第二故世謂牡丹為華王芍藥為華相又或以為華王之副也爾雅翼芍藥華之盛者當春莫祓除之時故鄭之士女取以相贈其根以和

五臟制食毒古有芍藥之醬合蘭桂五味以助諸食  
因呼五味之和為芍藥七發曰芍藥之醬子虛賦曰  
芍藥之和具而後御之服虔文潁伏儼輩解芍藥稱  
具美也或以為芍藥調食或以為五味之和或以為  
以蘭桂調食雖各得彷彿然未究名實之所起至韋  
昭又訓其讀勺丁削切藥旅酌切則并沒此物之名  
實矣今人食馬肝馬腸者猶合芍藥而鬻之古之遺  
法也毛萇云香草陸璣云今藥草芍藥無香氣非是

也孔穎達曰未審今何草蓋醫方但用其根陸不識其華故云無香氣孔又云何草今芍藥人家庭戶種之翫其芳無不識者何云何草

按韓詩云芍藥離草也言將離別贈此草也不過就漆洧說詩耳未必如護草為忘憂之說也終未悉為何草或云古人以牡丹為木芍藥此即牡丹誤矣牡丹之名經傳不載唯本草入草部中品六一居士牡丹記云自唐則天已後始盛于洛陽其先不過丹延

已西及褒斜道中與荊棘並多土人以為薪耳未聞其為鄭產也羅氏雅翼極與陸疏相合不知爾雅何故不載張揖以為孽夷亦未詳何義

言采其莫

莫莖大如箸赤節節一葉似柳葉厚而長有毛刺今人繅以取繭緒其味酢而滑始生可以為羹又可生食五方通謂之酸迷冀州人謂之乾絳河汾之間謂之莫

埤雅云河汾之間謂之莫其子如楮實而紅冀人謂



之乾絳蓋以此也今吳越之俗呼為茂子汾沮如之  
詩一章曰言采其莫二章曰言采其桑言其君儉以  
能勤始于侵繅事而采莫終于侵蠶事而采桑也

言采其蕒

蕒今澤蔦也其葉如車前草大其味亦相似徐州廣陵  
人食之

爾雅蕒牛脣郭註云毛詩傳曰水蔦也如蕒斷寸寸  
有節拔之可復邢疏云李巡曰別二名郭云如續斷

璣以為今澤蔦也郭氏所不取鄭註云狀似麻黃亦謂之續斷其節拔可復續生沙陂

按陸氏因毛傳水蔦誤為澤蔦李巡已非之鄭氏因郭註如薺斷直指為續斷愈失其真矣又按爾雅云薺蔦註云今澤蔦疏云即本草澤瀉也本草云澤瀉一名水瀉一名及瀉一名芒芋一名鵠瀉並無薺與水蔦之名又按本草云續斷一名龍頭一名屬折一名接骨一名南草一名槐生亦無薺與水蔦之名至其莖葉花

實之各異圖經已詳之

欽蔓于野

欽似枯樓葉盛而細其子正黑如燕窠不可食也幽州人謂之烏服其莖葉鬻以哺牛除熱

按本草欽有赤白黑三種疑此是黑欽也圖經云蔓生莖端五葉花青白色俗呼為五葉莓葉有五極子黑一名烏欽草即烏欽莓是也又云二月生苗多在林中作蔓蜀本註云或生人家籬牆間俗呼為籠草

兼葭蒼蒼

葦水草也堅實牛食之令牛肥強青徐州人謂之葦茺  
州遼東通語也葢一名蘆茺一名蘆蘆或謂之荻至秋  
堅成則謂之茺其初生三月中其心挺出其下本大如  
箸上銳而細揚州人謂之馬尾以今語驗之則蘆蘆別  
草也

按蒹葭二物相類而異種者也蒹小而中實凡曰荏  
曰藹曰莢曰藟曰蘆曰蘆曰蘆曰蘆一物九名皆蒹

也葭大而中空凡曰葦曰蘆曰華曰芳曰馬尾一物  
六名皆葭也葢因其萌也同時其秀也同時其堅成也  
亦同時又同產河洲江渚間故詩人往往並詠如葭  
芡揭揭八月荏葦及此篇三詠兼葭是也陸疏原云  
蘆亂別草但李巡認為一草朱子河廣注云葦兼葭  
之屬毛公大車傳云芡蘆之始生偶爾相混後人遂  
不能分別耳因分疏于右以俟讀者採擇焉

兼爾雅釋草云兼蘆

郭注云高數尺江東呼為蘆  
鄭注云荻也蘆屬而小可為

菰

郭鄭俱云似葦而小實中江東呼為烏菰

又釋言云菰離也菰亂

也

郭注云菰草色如離在青白之間

廣雅云藎也埤雅云藎即今

之藎一名藎藎藎之未秀者也一名藎高數尺今人

以為藎藎因此為名至秋堅成謂之藎說文曰藎之

初生一曰亂一曰離夏小正云藎未秀為藎大車曰

藎衣如藎說文曰縹離帛也引此藎衣如藎蓋青者

如藎故謂之縹一曰藎玄色字說曰藎中赤始生未

黑黑已而未故謂之藎其根旁行牽揉盤互其形無

辨矣而又强焉故謂之亂亂之始生常以無辨惟其  
强焉乃能為亂又鷓鴣云予所將茶傳曰茶萑茗今  
女匠亦以萑茶絮巢其色白故傳曰望而視之欲其  
茶白也

葭爾雅釋草云葭蘆

郭注云葭也

葭華

郭云即今蘆也鄭云亦謂蘆花

葭

醜兮

郭云其類皆有兮秀邢云葭即蘆之成者

埤雅云葭即今之蘆一名

葭葭葦之未秀者也一名華夏小正云葭未秀為蘆  
先儒以為萑如葦而細按禮曰土鼓蕢桴葦籥伊祁

氏之樂也葦管中簫則萑小而葦大矣是故謂之偉其字从韋荀子曰柔從若蒲葦葦可緯為簿席又云爾雅曰葦醜苒言其華皆有苒秀經風輒吹揚如雪其聚于地如絮淮南子云季夏令滂入入材葦

又按夏小正博雅埤雅爾雅註疏郭璞孫炎輩與陸疏甚合但李巡樊光及字說未免相戾毛傳朱註稍有異同今合考之其始萌曰蘗則蒹葭同名其餘皆異名矣据夏小正云七月秀萑葦未秀則不為萑葦



秀然後為萑葦則曰萑曰葦皆堅成後之名也鷓鴣  
云余所將茶河廣云一葦杭之是也曰蒹曰萑曰荻  
則萑未秀之名也曰蘆則葦未秀之名曰華曰芳則  
葦吐花之名也曰莢曰雛曰亂曰烏蘆則萑始生之  
名王風云毳衣如萑是也曰馬尾則葦始生之名  
南云彼茁者葭是也字說雖不足據其荻強而葭弱  
荻高而葭下二語頗得其形似

視爾如荻

菽一名芘芣一名荊葵似蕪菁華紫綠色可食微苦

爾雅云菽虵郭註云今荊葵也似葵紫色謝氏云  
小草多華少葉葉又翹起舍人云菽一名虵陳風  
云視爾如菽毛傳云芘芣也鄭註云菽蜀葵也爾雅  
翼菽荊葵也蓋戎葵之類比戎葵葉俱小故謝氏曰  
菽小草多花少葉葉又翹起也花似五銖錢大色粉  
紅有紫紋縷之一名錦葵大抵似蘆葍華故陸氏云  
似蕪菁花紫綠色可食微苦是也亦其文采相錯故

陳風男子悅女比之曰視爾如荍言如戎葵之花小  
而可愛也此與戎葵異類故釋草云有戎葵郭氏曰  
今蜀葵也似葵華如木槿又曰荍虵郭氏曰今荆  
葵也似葵紫色則戎葵與蜀葵荍與荆葵其所來各  
不同本草蜀葵中云小花者名錦葵一名戎葵功用  
更强則是以此雜之蜀葵中而又反得戎葵之名矣  
崔豹古今註又云荆葵一名戎葵一名芘芘似木槿  
而光色奪目有紅有紫有青有白有黃莖葉不殊但

色有異耳一曰蜀葵其說戎葵蜀葵之狀可也混荆  
葵比苺之名于內者非也然今人亦通呼此為錦蜀  
葵則從其類比附之爾又今有一種葉纖長而多缺  
如鋸花如錦葵而極紅每以夜半開至午則連房脫  
落謂之川蜀葵亦云朝開暮落花濮氏曰苺苺紫荆  
春時開花葉未生花紫色自根及幹而上連接甚密  
有類蟻窠故爾雅名虬蚺俗曰火蟻

按菽為荆葵者為蜀葵郭景純別之甚明鄭漁仲

註菽亦曰蜀葵誤矣漢氏直以為紫荊不知何見

可以漚紵

紵亦麻也科生數十莖宿根在地中至春自生不歲種

也荊揚之間一歲三收

一作刈

今官園種之歲再割割便

生剝之以鐵若竹刮其表厚皮自脫但得其裏韌如筋者鬻之用緝謂之徽紵今南越紵布皆用此麻

周禮典枲掌布絲縷紵之麻艸之物陸德明曰紵字又作苧張揖云苧三稜也說文云草也可以為繩

卽有旨茗

茗茗饒也幽州人謂之翹饒蔓生莖如勞豆而細葉似蒺藜而青其莖葉綠色可生食如小豆藿也

正義曰茗之華傳云茗陵茗此直云茗草彼陵茗之草好生下溼此則生于高丘與彼異也詩緝云此旨茗茗饒也非小雅茗之華所謂陵茗也

按孔氏以為好生下溼亦因陸疏誤認鼠尾為陵茗矣不知陵茗乃凌霄亦好生高阜者但二種俱不可

食與此音茗異耳

邛有音鷗

鷗五色作綬文故曰綬草

爾雅云鷗綬郭註云小草有雜色似綬

鷗音逆

邢疏云

鷗者雜色如綬文之草也鄭漁仲云疑即赤孫施草

也埤雅小草五色似綬故名綬草詩曰邛有音鷗言

欲有文采具備以成條理之臣如鷗者不戕賊之而

後得焉或曰鷗綬鳥也故鷗有雜色似綬其字从鷗

綬鳥大如鸛鵒頭頰似雉有時吐物長數寸食必蓄  
味臆前大如斗古今註云吐綬鳥一名功曹今俗謂  
之錦囊一名辟株行必遠草木慮觸其味劉公瑾云  
鷓鴣本鳥名亦名綬鳥咽下有囊如小綬具五色鷓鴣  
之名豈因其似鷓鴣鳥而取義乎

有蒲與荷

蒲始生取其中心入地者名蒲大如七柄正白生噉之  
甘脆鬻而以苦酒浸之如食筍法荷芙蕖江東呼荷其



莖茹其葉蘼莪下白朮其花未發為菡萏已發為芙蓉  
其實蓮蓬青皮裏白子為的的中有青長三分如鉤為  
薏苡甚苦故里語云苦如薏是也的五月中生生啖脆  
至秋表皮黑的成食或可磨以為飯如粟也輕身益氣  
令人強健又可為糜幽州揚豫取備饑年其根為藕幽  
州謂之光旁為光如斗角

蒲爾雅云莞苻離其上萬郭註云今西方人呼蒲為  
莞蒲菖謂其頭臺首也江東謂之苻離西方亦名蒲

中莖為萐鄭註云即蒲也西人呼為莞蒲謂其首為  
臺江東謂之符籬其上臺莖別名萐說文云水草似  
莞而褊有脊生于水厓柔滑而溫可以為席周禮醯  
人深蒲醢醢鄭司農云深蒲蒲弱入水深故云深蒲  
詩緝云斯干下莞箋云小蒲則莞精蒲麤

荷爾雅云芙蕖其莖茄其葉蓮其本蔞

莖下白藕在泥中者

其

華齒菖其實蓮

謂房也

其根藕其中的

謂子也

的中薏

中苦

也李巡曰皆分別蓮莖華葉實之名芙蕖其總名也

今江東人呼荷華為芙蓉北方人便以藕為荷亦以蓮為荷  
蜀人以藕為茄或用其母為華名或用根子為母葉號  
此皆名相錯習俗傳誤失其正體者也埤雅荷總名郭  
璞以為芙蕖一名芙蓉按說文云未發為萏菡已發  
為芙蓉芙蓉華之號也蓋亦通曰芙蕖毛詩傳云荷  
芙蕖也其華萏菡許慎以為其華曰芙蓉其秀曰萏  
菡其實曰蓮蓮之茂者曰華今其的中青為薏皆  
倒生兩牙一或菱荷一蕩荷也又生一牙為華蕩荷

帖水生蕩者也。芰荷無蕩，卷荷也。與華偶生出乎水上，亭亭如繖者，或謂之距荷。蕩荷一本，其支傍行爲蕩節，生一華一葉。詩曰：有蒲與荷，蓋荷善傾，歌蒲無骨幹。而柔從字說曰：蕩藏于水，其自處卑無所加焉。其所與汙潔白自若，中有空焉，不偶不生。若此，可以偶物矣。而無枝附泥，不能汚水，不能沒挺出而立。若此，可以加物矣。蓮既有以自闕，又會而屬焉。若此，可以連物矣。菡萏實若自隨，昏昕闔闢焉，護假根以立。

而不如蕩之有所偶假莖以出而不如茄之有所加  
假華以生而不如蓮之有所連菡萏之有萏也若此  
可謂選矣夫函物者終于吐連物者終于散偶物者  
或析之加物亦不可以為常故選在此不在彼也蓋退  
藏于無用而可用可見者本焉若此可謂密矣合此  
衆美則可以何物可以為夫可以為渠故曰荷芙蓉  
也荷以何物為義故通于負荷之字菡萏爾雅曰其  
華菡萏其實蓮蓋萼曰芙蓉秀曰菡萏暢茂曰華古

今注曰芙蓉一名荷華華之最秀異者也。大者華百葉然則華亦謂之芙蓉。楚辭所謂零芙蓉兮木末葢言此也。凡物皆先華而後實。獨此華果齊生。故西域之書多言此詩曰有蒲與荷有蒲與蕳有蒲菡萏荷言其質之柔簡言其氣之芳馥菡萏言其色之美。拾遺記曰昆流素蓮一房百子。凌冬而茂。王文公曰蓮華有色有香。得日光乃開。敷生卑濕淤泥不生高原陸地。雖生于水水不能沒。雖在淤泥不能污。即華時

有實然華事始則實隱華事已則實現實始于黃終  
于玄而莖葉綠葉始生也乃有微赤實既能生根根  
又能生實實一而已根則無量一與無量互相生起  
其根曰蕩常偶而生其中為本華實所出蕩白有空  
食之心歡本實有黑然其生起為綠為黃為玄為白  
為青為赤而無有黑無見無用而有見有用皆因以  
出其名曰菴退藏于密故也藕爾雅曰其本菴其根  
蕩蓋莖下白藕在泥中者菴藕偶生又善耕泥引長

故藕之文以耦名之亦曰藕今江左穿池取汲不欲  
種藕以藕善耕泥壞池也俗云藕生應月月生一節  
閏輒益一趙辟公雜記曰藕能移鯉能飛龜能守凡  
芙蓉行藕如竹之行鞭耳節生一葉一華華葉常偶  
生故謂之藕又華初著子首顧在下久之其房倒垂  
首更在上也爾雅翼宋時太官作血鮑音勸庖人削藕  
皮誤落血中遂散不凝醫乃用藕療血多效葉可裹  
物漢鄭敬為新遷功曹與同郡鄧敬折芰為坐以荷



為肉齊師伐梁以糧運不繼調市人餽軍建康令孔  
奐以麥屑為飯用荷葉裹之一宿得數萬裹古今注  
一名水芝一名澤芝一名水花管子曰五沃之土生  
蓮援神契曰王者德至于地則華華感注云華華並  
頭蓮也本草衍義云粉紅千葉白千葉者皆不實其  
根惟白蓮為佳今禁中又生碧蓮

按蒲是水草與魚藻依于其蒲蒲字同埤雅謂不流  
束蒲亦同是草與朱注相戾詳見揚之水篇又按有

蒲與簡鄭氏謂簡當作蓮芙蓉實也韓氏溱洧秉簡  
釋文云簡蓮也豈古人蓮簡通用耶

隰有萋楚

萋楚今羊桃是也葉長而狹華紫赤色其枝莖弱過一  
尺引蔓于草上今人以為汲灌重而善沒不如楊柳也  
近下根刀切其皮著熱灰中脫之可韜筆管

爾雅云萋楚鉞芎郭云今羊桃也或曰鬼桃葉似桃  
華白子如小麥亦似桃鄭亦云長楚羊桃也藤生子

赤狀如鼠糞故亦名鼠矢兒童食之本草羊桃一名  
羊腸一名御弋生山林川谷及田野陶隱居云山野  
多有甚似蜜桃又非山桃子細小苦不堪噉花甚赤  
蜀本圖經云葉花似桃子細如棗核苗長弱即蔓生  
不能為樹多生溪澗今人呼為細子根似牡丹鄭箋  
云鉞弋之性始生正直及其長大則其枝猗儺而柔  
順不妄尋蔓草木埤雅云長楚今羊桃也白華子如  
小麥其葉與實皆似桃故有桃之號也一曰有兩羊

卷上之上  
桃一種華實皆連理故詩以刺淫恣

按莢楚莖弱不能為樹牽弱于草木又何揀擇康成  
乃云不妄尋蔓耶或曲體毛序疾恣之說而取興耳  
但草木疏云花紫赤色圖經亦云花甚赤景純農師  
俱云花白則矛盾矣

浸彼苞稂

稂童梁禾秀為穗而不成斲巍然謂之童梁今人謂之  
宿田翁或謂守田也甫田云不稂不莠外傳曰馬不過

稂莠皆是也

爾雅云稂童梁郭云莠類也鄭註云稂童梁守田也俗呼鬼稻云米之所產一穗之間得一二穀而已傳云稂非溉草得水而病也箋云稂當作涼涼草蕭著之屬孔氏疏鄭以苞稂則是童梁為禾中別物作者當言浸禾不應獨舉浸稂且下章蕭著皆是野草此不宜獨為禾中之草故易傳以為稂當作涼涼草蕭著之屬釋草不見草名涼者未知鄭何所據爾雅翼

稂惡草也與禾相雜故詩人惡之古者以飼馬魯仲  
孫宅馬餼不過稂莠謂此也釋草稂童梁郭璞以為  
莠類說文云禾粟為穗而不成崩疑然謂之童梁今  
人謂之宿田翁或謂之守田也按詩稱稼之茂美繼  
之以不稂不莠去其螟螣及其蠹賊則稂莠以下皆  
是害稼者孔氏正義云稂莠苗既似禾實亦類粟鋤  
禾除非類莠既別是一物則稂亦當是一物故郭璞  
云莠類蓋未能的知其物故稱其類耳而許叔重陸

璣以為禾之不成者則是亦禾而已何至與莠並稱乎按本草有狼尾草子作黍食之令人不飢似茅作穗生澤地廣志曰可作黍引爾雅孟狼尾今人呼為狼茅子然則此物似是稂爾稂既有實如黍故能亂苗又莠今謂之狗尾草稂名狼尾則亦相類爾雅疏解孟狼尾亦云草似茅者今人亦以覆屋說文曰禾粟之生而不成者謂之董節節或从禾作稂

### 食野之葷

草葉青白色莖似箸而輕脆

一作肥

始生香可生食又可

蒸食

爾雅云草藟蕭郭註云今藟蒿也初生亦可食詩小雅云呦呦鹿鳴食野之草鄭註云草藟蒿也盧氏雜說云唐文宗問宰臣草是何草李珣曰是藟蕭上曰朕看毛詩疏草葉圓而花白叢生野中似非藟蕭按毛傳云草萍也陸氏羅氏遂以為水上小浮萍且云鹿飲且食也令人失笑鄭氏謂水萍非野所生非



鹿所食易之曰藟蕭孔疏朱傳俱因之蔓蒿別是一種鄭漁仲何亦誤註豈附會唐文宗非藟蕭之說耶

### 食野之蒿

蒿青蒿也荆豫之間汝南汝陰皆云蒿也

爾雅云蒿蒿郭云今人呼青蒿香中炙啖者為蒿詩小雅云食野之蒿孫炎云荆楚之間謂蒿為蒿鄭亦云青蒿也本草云草蒿一名青蒿一名方漬生華陰川澤唐本注云江東人呼為猧蒿為其臭似猧圖經

云葉似茵陳蒿而背不白春生苗葉極細嫩時人亦  
取雜諸香菜食之至夏高四五尺秋後開細淡黃花  
花下便結子如粟米大衍義云草蒿即青蒿也得春  
最早人別以為蔬根赤葉香埤雅晏子曰蒿草之高  
者也又曰青蒿蒿背之白者也說文耄从蒿省蓋  
五十象艾六十象蓍七十象蒿艾治也蒿亂也蒿之  
類至多如青蒿一類自有兩種有黃色者有青色者  
本草謂之青蒿亦恐有別也陝西綏銀之間有青蒿

在蒿叢之間時有一兩株迥然青色土人謂之香蒿  
莖葉與常蒿悉同但比常蒿色青翠一如松檜之色  
至深秋餘蒿並黃此蒿猶青氣稍芬香恐古人所用  
以此為勝爾雅翼蒿今之青蒿莊子稱今之君子蒿  
目而憂世之患今蒿細弱而陰潤最易棲塵故以比  
蒿目言世之君子眯眼塵中而憂世也明堂月令違  
天時則藜莠蓬蒿並興然則蒿者蓋非農祥也博物  
志曰周時德盛蒿大以為宮柱名曰蒿宮

食野之苓

苓草莖如釵股葉如竹蔓生澤中下地鹹處為草真實  
牛馬皆喜食之

爾雅翼曰鹿鳴所食三物一曰苹今賴蕭始生香可  
食二曰蒿蒿甚香三曰苓苓亦香草蓋草木之臭味  
相同有同類食之之義

按苓草爾雅埤雅俱不載不知為何物惟博雅云黃  
文內虛苓也此即本草黃苓一名經苓陶隱居云圓

者名子苓破者名宿苓及考圖經云莖如箸葉從地  
四面作叢生似與陸疏不同種

集于苞杞

杞其樹如樗一名苦杞一名地骨春生作羹茹微苦其  
莖似莓子秋熟正赤莖葉及子服之輕身益氣

爾雅杞枸欒郭鄭注俱云枸杞也本草云枸杞味苦  
寒久服堅筋骨輕身不老一名杞根一名地骨一名  
枸杞一名地輔一名羊乳一名却暑一名仙人杖一

名西王母杖生常山平澤及諸丘陵阪岸冬採根春

夏採葉秋採莖實抱朴子云家菜

一作菜

一名托盧或

名天精或名却老或名地骨日華子云地仙苗即枸

杞圖經云春生苗葉如石榴葉而軟薄堪食俗呼為

甜菜其莖幹高三五尺作叢六七月生小紅紫花隨

結紅實形微長如棗核其根名地骨與枸棘相類其

實形長而枝無刺者真枸杞也圓而有刺者枸棘也

世傳蓬萊縣南丘村多枸杞高者一二丈其根盤結

甚固其鄉人多壽考亦飲食其水土之品使然耳潤  
州州寺大井傍生枸杞亦歲久故土人目為枸杞井  
云飲其水甚益人又按枸杞一名仙人杖而陳藏器  
拾遺別有兩種仙人杖一種是枯死竹竿之色黑者  
一種是菜類并此為三物而同一名也陳子昂觀玉  
篇云余從補闕喬公北征次于張掖河洲惟仙人杖  
往往叢生戍人有薦嘉蔬者此物存焉因為喬公言  
其功時王仲烈亦同旅喜而食之旬有五日有人自

謂知藥者謂喬公曰此白棘也仲烈遂疑曰吾亦怪其味甘喬公信是言乃譏予予因作觀玉篇按此仙人杖作菜茹者葉似苦苣白棘木類何因相似而致疑或曰白棘當是枸棘然本經枸棘又無白棘之別名況枸棘又非甘物乃知草木之類多而難識使人惑于疑似之言以真為偽宜子昂論著之詳也廣雅云地筋枸杞衍義云凡杞未有無刺者雖大至有成架然亦有刺但小則多刺大則少刺如酸棗及棘其實一



也後人分別枸棘強生名耳詩緝云詩有三杞將仲  
子無折我樹杞柳屬也南山有臺南山有杞湛露在  
彼杞棘山木也此詩集于苞杞雅杖杜北山言采其  
杞四月隰有杞檋枸杞也

按嚴華谷詩緝云南山有杞之杞是山木與此篇杞  
是二種確甚朱文公註南山之杞云樹如檋極肖其  
形若陸氏疏此杞亦云樹如檋幾相溷矣考本草枸  
杞固入木部但見有成架未見有成林者惟沈存中

云陝西極邊枸杞最大高丈餘可作柱亦豈與山樗  
並蔽芾耶

南山有臺

臺夫須舊說夫須莎草也可為蓑笠都人士云臺笠緇  
撮或云臺草有皮堅細滑緻可為簦笠以禦雨是也南  
山多有

爾雅云臺夫須郭景純曰鄭箋云臺可以為禦雨笠  
舍人云臺一名夫須詩小雅云南山有臺都人士云

臺笠緇撮箋云都人之士以臺皮為笠也鄭漁仲云  
臺即雲臺葉舊說以為莎草埤雅臺夫須夫須莎草  
也可以為笠又可以為蓑疏而無溫故莎以沙與內  
司服所謂素沙同意爾雅翼臺者沙草可為衣以禦  
雨今人謂之蓑衣毛氏云臺所以禦暑笠所以禦雨  
箋云臺夫須也以臺皮為笠毛氏知臺笠為二物但  
獨言笠禦雨未當鄭氏則言臺皮為笠夫臺但可以  
為衣不可以為笠古稱臺笠蓑笠自謂臺與笠爾不

必以臺笠緇撮之語必欲合為一物也齊語曰今夫  
農時雨既至脫衣就功首戴茅蒲身衣襜褕韋昭曰  
茅蒲蒼笠也茅或作萌萌竹萌之皮所以為笠則笠  
不用臺為可知又曰襜褕蓑薜衣也則襜褕以沙草  
為之今人作笠亦多編筍皮及箬葉為之其臺為衣  
編之若甲冑毳而垂故雨順注而下然或藉而臥則  
不能隔雨山海經曰三危之山有獸其豪如被蓑郭  
氏亦云蓑被雨草衣則蓑但可為衣不可為笠明矣

臺一名曰夫須蓋匹夫所須纂文曰臺一名山莎本草香附子即莎草根生田野二月八月採圖經云香附子交州者大如棗近道者如杏仁苗莖葉都似三稜根若附子周匝多毛今近道生者苗葉如薤而瘦根如箸頭大

北山有萊

萊草名其葉可食今兗州人蒸以為茹謂之萊蒸

說文云萊蔓華也从艸來聲洛哀切黃直翁云詩北

山有萊通作釐爾雅釐草與萊同韻吳才老云萊夫  
須也陸璣草木疏云萊藜也爾雅作釐郭璞遊仙詩  
云朱門何足榮未若托蓬萊臨源挹清波陵岡掇丹  
黃

按爾雅云釐蔓華說文云萊蔓華則萊即釐無疑矣  
韻補韻會諸書俱云萊釐同韻范石湖吳郡志云來  
釐吳音並用小雅南山章與臺

田飴反

基期同叶則二

字同音又無疑矣但諸韻書俱引草木疏云萊藜也

今疏本文不載可見陸疏逸去者甚多如夫須即南山有臺之臺草不知才老何以云然又藜草似蓬一名洛帚大可為杖杜子美云清風獨杖藜疑與萊異種據景純漁仲註釐一名蒙華未詳其狀何似

菁菁者莪

莪蒿也一名蘿蒿生澤田漸洳之處葉似邪蒿而細科生三月中莖可生食又可蒸食香美味頗似萹蒿

爾雅云莪蘿郭註今莪蒿也亦曰蘆蒿鄭註莪蒿也

本草謂之蘆蒿似艾而細可食本草云角蒿唐註云  
葉似白蒿花如瞿麥紅赤可愛子似王不留行黑色  
作角七月八月采蜀本云葉似蛇牀青蒿等子角似  
蔓青實黑細秋熟所在皆有之陳藏器云蘆蒿生高  
岡宿根先于百草一名莪蒿衍義云角蒿莖葉如青  
蒿開淡紅紫花花大約徑三四分花罷結子長二寸  
許微彎埤雅莪亦曰蘆蒿蘆之為言高也莪生澤國  
漸洳之地葉似斜蒿而細科生可食宿根先于百草



一名蘿蒿一名角蒿詩曰菁菁者莪在彼中阿阿大陵也莪微草也言君子之長育人材猶大陵之長育微草也菁菁盛貌蓋草之初生其色玄盛則乃青霜死而後黃落故菁之文从青詩曰何草不玄以言其生何草不黃以言其死也爾雅釋蟲曰蛾羅也釋草又曰莪蘿也蓋蛾所以生蠶莪亦所以覆而出之此義亦謂之羅與字說曰莪以科生而俄詩曰匪莪伊蒿匪莪伊蔚莪俄而蒿直蔚麓而莪細育材之詩正

言莢者以此爾雅翼莢蘿蒿也生于水澤詩云在彼中阿在彼中沚在彼中陵蓋莢水中所生陵阿亦通有之

按蒿類甚多爾雅云繁之醜秋為蒿言春時各有種名至秋老成通呼為蒿也張揖謂白蒿為繁母即此意凡蒿皆入藥品此章菁菁者莢莢為莢蒿即本草角蒿也采繁云予以采繁繁為皤蒿即本草白蒿也鹿鳴云食野之蒿蒿為青蒿即本草草蒿也蓼莢云

匪義伊蔚蔚為牡蒿即本草馬先蒿也

薄言采芑

芑菜似苦菜也莖青白色摘其葉有白汁出脆可生食亦可蒸為茹青州謂之芑西河鴈門尤美胡人戀之不出塞

朱傳云即今苦蕒菜宜馬食軍行采之人馬皆可食也本草云野苦蕒五六回拗後味甘滑于家苦蕒

按朱晦菴云苦菜也陸元恪又云似苦菜則又一種

矣顏氏家訓云江南別有苦菜葉似酸漿其花或紫  
或白子大如珠熟時或赤或黑此菜可以釋勞案郭  
景純註爾雅云此乃職黃除也今河北謂之龍葵梁  
世講禮者以此當苦菜既無宿根至春子方生耳亦  
大誤也据云此菜可以釋勞宜乎人馬皆食又云至  
春方生似合軍行之時或青州鴈門以為芑江南無  
其名耳

言采其遂

遂牛藟揚州人謂之羊蹄似蘆菹而莖赤可淪為茹滑而美也多啖令人下氣幽州人謂之遂

爾雅云藟牛藟邢氏云藟一名牛藟詩小雅云言采

其遂鄭箋云遂牛藟郭云今江東呼草為牛藟者高

尺餘許方莖葉長而銳有穗穗間有華華紫縹色可

淋以為飲者

字林云縹青白色淋以水沃也

鄭樵註云藟即羊蹄菜

張揖云莖羊蹄也本草云羊蹄一名東方宿一名連

蟲陸一名鬼目一名蓄陶隱居云今人呼禿菜即是

蓄音之誤詩云言采其蓄圖經云羊蹄菜也生下濕地春生苗高三四尺葉狹長頗似萵苣而色深莖節間紫赤花青白成穗子三稜有若荒蔚夏中即枯根似牛蒡而堅實詩小雅云言采其葍或作蓄又有一種極相類而葉黃味酢名酸摸爾雅所謂須臾蕪郭璞云似羊蹄葉細味酢可食一名葍是也行義云葉如菜中菠薐但無岐而色差青白葉厚花與子亦相似

按傳云遂惡菜與本草羊蹄俗呼禿菜者相似陸元恪又稱其美可多啖何也郭璞註爾雅牛蒡未嘗明指為遂宜乎孔穎達云釋草無文矣僅見邢疏引詩句以鄭箋遂牛蒡為証亦無確見至圖經雖亦引詩句其形色與陸疏不甚合又見釋草有云遂者圖經又相類因附載以備參考爾雅云遂蕘馬尾邢氏云藥草蒡陸也一名遂蕘一名馬尾郭註云廣雅曰馬尾蒡陸本草云別名蕘今關西呼為蕘江東為當

陸按本草蒟陸一名蕩根一名夜呼不同者所見本異也今註云一名白昌一名當陸是也鄭註亦云即商陸廣雅云常蓼馬尾商陸也圖經云商陸俗名章柳根生咸陽山谷今處處有之多生于人家園圃中春生苗高三四尺葉青如牛舌而長莖青赤至柔脆夏秋間紅紫花作朶根如蘆菔而長如人形者有神爾雅謂之遂廣雅謂之馬尾易謂之莧陸皆謂此商陸也然有赤白二種花赤者根赤花白者根白易曰



莧陸卅卅莧與陸皆陰類也或曰此一物即名章陸  
今俗名章柳根又一名夜呼莫知其義據荆楚歲時  
記三月三日杜鵑初鳴田家候之此鳥鳴盡夜口亦  
上天乞恩至章陸子熟乃止然則章陸子未熟以前  
為杜鵑鳴之候故稱夜呼

言采其莧

莧一名當河內謂之葦幽州人謂之燕莧其根正白可  
著熱灰中溫噉之饑荒之歲可蒸以禦饑漢祭甘泉或

用之其草有兩種葉細而花赤有臭氣也

一本作花葉有兩種一種

葉細而花赤一種  
葉大而花白復香

爾雅云藟藟郭云大葉白華根如指正白可啖鄭云  
即商陸也爾雅又云藟藟茅郭云藟華有赤者為藟  
藟藟一種耳亦猶藟藟華黃白異名鄭云商陸有二  
種赤者為藟茅毛傳云藟惡菜也鄭箋云藟亦仲春  
時生可采也博雅云烏藟藟也邢氏云藟一名藟與  
藟茅一草也華白者即名藟華赤者別名藟茅故郭

云亦猶淺苔華黃白異名也

匪莪伊蔚

蔚牡蒿也三月始生七月華華似胡麻華而紫赤八月為角角似小豆角銳而長一名馬薪蒿

爾雅云蔚牡蒿郭鄭註俱云蔚即蒿之雄無子者故云牡蒿本草云馬先蒿生南陽川澤葉如益母草花紅白八九月有實俗謂之虎林亦名馬薪蒿詩所謂匪莪伊蔚是也但郭註云牡蒿無子者而陸云有子

二說小異今當用有子者為正陶隱居云一名爛石  
草爾雅翼蔚蒿葍郭氏曰今人呼青蒿香中炙啖者  
為葍又曰蔚牡葍郭曰無子者詩曰蓼蓼者莪匪莪  
伊蒿哀哀父母生我劬勞又曰蓼蓼者莪匪莪伊蔚  
哀哀父母生我勞瘁蒿生子以喻母牡蒿以喻父凡  
人之情念其父母則因物而感一說曰匪莪伊蒿蒿  
猶有子者匪莪伊蔚蔚則無子以見父母得我之難  
也今皆無報矣則有我之不如無也且蔚又治無子

亦寓其意焉

蔦與女蘿

蔦一名寄生葉似當盧子如覆盆子赤黑甜美女蘿今  
兔絲蔓連草上生黃赤如金今合藥兔絲子是也非松  
蘿松蘿自蔓松上生枝正青與兔絲殊異

蔦爾雅云寓木穴童郭云寄生樹一名蔦鄭云樹上  
寄生木也有二種一種葉圓名蔦一種似麻黃名女

蘿

女蘿與蔦確是二物  
不知漁仲何以云然

博雅云寄屏寄生也本草云

桑上寄生一名寄屑一名爲生弘農川谷桑樹上陶  
隱居云桑上者名桑寄生爾詩云施于松上方家亦  
用楊上楓上者各隨其樹名之形類猶是一般但根  
津所因處爲異生樹枝間寄根在皮節之內葉圓青  
赤厚澤易析旁自生節冬夏生四月花白五月實赤  
大如小豆圖經云桑寄生云是烏鳥食物子糞落枝  
節間感氣而生葉似橘而厚軟莖似槐枝而肥脆三  
四月間花黃白色六月結實黃色如小豆榦櫟柳木

楊楓等樹皆有惟桑上者堪用

女蘿爾雅云唐蒙女蘿女蘿兔絲註云別四名詩云  
爰采唐矣疏云孫炎曰別三名郭云別四名則唐與  
蒙或并或別故三四異也詩經直言唐而傳云唐蒙  
也是以蒙解唐也則四名為得下又云蒙玉女郭云  
即唐也女蘿別名是又名玉女鄭云即女蘿也然則  
唐也蒙也女蘿也兔絲也玉女也凡五名詩類弁云  
與女蘿也埤雅在木為女蘿在草為菟絲舊說上有

菟絲下必有伏菟之根無此菟在下則絲不得生乎  
上然其實不屬也淮南子曰下有伏苓上有兔絲詩  
曰蔦與女蘿施于松柏言蔦之為物寄生而女蘿浮  
蔓尚得施于松柏可以人而不如乎且姓同本而生  
族同支而出則與寄生浮蔓者異矣故詩以此駁王  
又曰菟絲無根而生蛇無足而行魚無耳而聽蟬無  
口而鳴皆自然也爾雅翼女蘿菟絲其實二物也  
然皆附木上廣雅云女蘿松蘿也菟丘菟絲也則是



兩物今女蘿正青而細長無雜蔓故山鬼章云被薜  
荔兮帶女蘿蘿青而長如帶也何與兔絲事然兩者  
皆附木或當有時相蔓古樂府云南山幕幕兔絲花  
北陵青青女蘿樹由來花樹同一根今日枝條分兩  
處唐樂府亦云兔絲故無情隨風任顛倒誰使女蘿  
枝而來強縈抱兩草猶一人心不如草則古今多  
知其為二物者博物志魏文帝所記諸物相似亂者  
女蘿寄生兔絲兔絲寄生木上根不著地然則女蘿

有寄生兔絲上者爾雅女蘿兔絲或亦此義爾本草

草部云菟絲子一名菟蘆一名菟縷一名唐蒙

圖經云爾

雅疏云唐也蒙也而本草并以唐蒙為一名似毛傳本此一名玉女一名赤網一

名菟纍生朝鮮川澤田野蔓延草木之上色黃而細為赤網色淺而大為菟纍九月採實又木部云松蘿一名女蘿生熊耳山川谷松樹上五月採

按毛公傳云女蘿兔絲松蘿也李善因古詩云與君為新昏兔絲附女蘿註云二者異草毛公誤合為一

此與張揖同見但合叅爾雅埤雅及郭鄭諸家俱  
以為一物而異其名耳惟陸氏云女蘿非松蘿本  
草分菟絲入草部松蘿入木部似與陸氏合符然  
又云松蘿一名女蘿何耶此詩云蔦與女蘿施于  
松上應是松蘿松蘿與女蘿兔絲原非異種總是  
依附纏綿于他物而生長不能自植者在草則附  
于草在木則附于木陸佃分在草曰菟絲在木曰女  
蘿亦非確見

白華管兮

管似茅而滑澤無毛根下五寸中有白粉者柔靱宜為  
索漚乃尤善矣

爾雅云白華野管舍人云白華一名野管郭云茅屬  
此白華亦是茅之類也漚之柔靱異其名謂之為管  
因謂在野未漚者為野管耳詩小雅云白華管兮是  
也鄭氏云今亦謂之管似茅而高大孔疏曰鄭箋云  
人刈白華于野已漚之名之為管然則管者已漚之

名未漚則但名為茅也陸農師云爾雅曰白華野管  
傳曰已漚為管未漚人功故謂之野管管茅屬也而  
其華白故一曰白華詩序曰白華孝子之潔白也南  
陔孝子相戒以養也陔戒也故曰相戒以養逸詩曰雖  
有姬姜無棄憔悴雖有絲枲無棄管蒯管蒯猶所謂糟  
糠也范氏曰管以為屨濮氏曰左傳云雖有絲麻無  
棄管蒯蒯與管皆謂苧也黃花者俗名黃苳即蒯也  
白華者俗名白苳即管也異物志云香管似茅而葉

長大于茅不生滂下之地凡所烝享必得此管包裹  
助調五味

按郭景純云管茅屬而陸疏鄭註朱傳俱云似茅確  
是二物下章云露彼管茅猶逸詩云無棄管蒯也茅  
乃散材管為女作纖微所不棄者故東門之池與麻  
紵同詠也孔氏以為已漚為管未漚為茅恐未必然  
惟邢氏云未漚為野管斯得耳濮氏以為苔想誤認  
為蓍蓍之醜矣若異物志所載香管又是一種想成

王時會人獻以管即此類也

苔之華

苔一名陵時一名鼠尾似王芻生下濕水中七八月中  
華紫似今紫草花可染皂鬻以沐髮即黑葉青如藍而  
多華

爾雅云苔陵苔黃華藟白華茈郭注云一名陵時邢  
疏曰黃華名藟白華名茈別花色之名也鄭箋云陵  
苔之華紫赤而繁陸璣亦言其花紫色而此云黃白

者蓋就紫色之中有黃紫白紫耳及其將落則全變為黃故詩云芸其黃矣毛傳云將落則黃是也鄭注云陵茗今謂之凌霄花本草謂之紫葳蔓生依緣樹木皆黃花少見有白華者博雅云此葳陵茗瞿麥也本草云紫葳一名陵茗一名茱萸華生西海川谷及山陽劉禹錫云一名女葳圖經云陵茗凌霄花也多生山中人家園圃亦或種蒔初作藤蔓生依大木歲久延引至顛而有花其花黃赤夏中乃盛陶隱居云詩



有茗之華按爾雅茗陵茗郭云一名陵時又據陸璣  
及孔穎達疏義亦云茗一名陵時陵時乃是鼠尾草  
之別名本草紫葳無陵時之名而鼠尾草有之乃知  
以陵時作陵霄耳又陵霄非是草類益可明其誤矣  
衍義曰紫葳今蔓延而生謂之為草又木身謂之為  
木又須物而上然榦不逐冬斃亦得木之多也故分  
入木部為至當唐白樂天詩有木名凌霄擢秀非孤  
標益知非草也本經又云莖葉味苦是與瞿麥別一

種甚明唐本注云且紫葳瞿麥皆本經所載若用瞿  
麥根為紫葳何得復用莖葉此說盡矣然其花赭黃  
色本條雖不言其花又却言莖葉味苦則紫葳為花  
故可知矣爾雅翼荂今陵霄花是也蔓生喬木極木  
所至開花其端詩云荂之華芸其黃矣鄭箋以為陵  
荂之華紫赤而繁華衰則黃葢非也是物雖名紫葳  
而花不紫又或以瞿麥根為紫葳瞿麥花紅亦非此  
類然則芸其黃者正自花開之色耳此華亦彌絡石

壁盛夏視之如錦繡不可仰望露滴目中有失明者  
名物疏云陵苕即陵霄也故本草云茱萸與爾雅合  
陸璣疏則以為鼠尾爾雅云勤鼠尾註云可以染皂  
本草經云鼠尾草有白華者赤華者一名勤一名陵  
翹生平澤中四月採葉七月採華陶隱居云田野甚  
多人採作滋染皂圖經云苗如蒿夏生莖端作四五  
穗穗若車前與陸說生下濕七月花可染皂者相似  
則陸誤以陵苕為鼠尾矣又或以紫葳為瞿麥根瞿

麥即爾雅所謂大菊蘧麥亦非也陵苕斷即女葳陸璣疏全謬不可從

莫莫葛藟

藟一名巨菰似燕莫亦延蔓生葉如艾白色其子赤可食酢而不美幽州謂之推藟

爾雅云諸慮山梟郭註云今江東呼梟為藤似葛而龐大鄭註云諸慮山藤也詩稱葛藟本草千歲梟梟皆謂藤本草云千歲梟一名藟燕陶隱居云樹如葡

葡萄葉如鬼桃陳藏器云似葛蔓葉小白子赤條中有  
白汁圖經云蘂生泰山川谷作藤蔓延木上葉如葡  
萄而小四月摘其莖汁白而甘五月開花七月結實  
八月採子青黑微赤冬惟凋葉此即詩云葛藟者也  
蘇恭謂是蘂蘂藤深為謬妄左傳云葛藟猶能庇其  
本根按經中藟必與葛同詠如葛藟藟之綿綿葛藟  
諸什是也疑是草屬爾雅入釋木後人多以木類解  
之但葛覃采葛萑生詠葛者其多陸氏疏不載因附

補遺于卷末

取蕭祭脂

蕭荻今人所謂荻蒿者是也或云牛尾蒿似白蒿白葉莖麤科一作斜非生多者數十莖可作燭有香氣故祭祀以

脂熬之為香許慎以為艾蒿非也郊特牲云既奠然後熬蕭合馨香是也

爾雅云蕭荻郭註云即蒿鄭註云蕭荻音秋即青蒿

也或云牛尾蒿今藥家謂之青箱子埤雅蕭可以

祭故其字从肅亦秋風之過蕭意象肅然詩曰取蕭祭  
脂凡祭灌鬯求諸陰燭蕭求諸陽奏樂求諸陰陽之間  
故禮曰聲音之號所以詔告于天地之間也又曰見以蕭  
光以報氣也加以鬱鬯以報魄也凡祭周人先求諸陰故  
先灌鬯燭蕭在後商人先求諸陽故先燭蕭灌鬯在後  
也詩曰冽彼下泉浸彼苞蕭民者上之所恃以事宗廟  
社稷蕭之象也又曰蓼彼蕭斯零露漙兮蕭微物也而  
其香能上達故詩亦以況四海之諸侯爾雅翼蕭今人

所謂荻蕭者是也生民詩云取蕭祭脂后稷之祭也蓋宗廟之祭薦熟之時堂上事尸竟延入戶內更從孰始于薦熟時祝先酌奠于鉶羹之內訖尸未入乃取蕭染以牲腸間脂合黍稷燒之于宮中后稷之祀乃郊雖非宗廟然將郊為輶道之祭其用亦同熟之于行神之位故曰取羝以軋祭脂者即此羝之脂也蓋自后稷之時已如此故周宗廟用之昔有虞氏尚氣血腥燭祭用氣商人尚聲以聲音之號詔告天地之間周人尚臭以鬱



合室灌以圭璋而使臭陰達于淵泉既奠然後燂蕭  
合黍稷羶薌熟之而使臭陽達于牆屋臭陰以水而  
報魄臭陽以火而報氣古人以神之道微不可搏執  
故求萬物之理以為同聲相應同氣相求水流濕火就  
燥故用百物之英華庶幾麗而留之此蕭之氣達于牆  
屋則牆內乃蕪蕭之地故孔子曰吾恐季孫之憂不  
在顓臾而在蕭牆之內也其蕭蓋甸師所供周禮甸  
師祭祀共蕭茅先鄭以為蕭或作茵但作縮茅解之

杜子春始讀為蕭詩緝云蒿者總名蕭蒿之香者也  
維筍及蒲

筍竹萌也皆四月生維巴竹筍八月九月生始出地長  
數寸鬻以苦酒豉汁浸之可以就酒及食

爾雅云筍竹萌邢疏云孫炎曰竹初萌生謂之筍凡  
草木初生謂之萌筍則竹之初生者可以為菜穀詩  
大雅韓奕云其蔌維何維筍及蒲是也爾雅又云簋  
箭萌郭註云萌筍屬也鄭註云箭竹筍也通志云凡

筍類惟箭筍為美故會稽竹箭有聞焉周禮天官醢人云箘簋雁醢筍箘魚醢呂覽云和之美者越酪之菌註越酪山名菌竹筍也筍譜云竹初種根食土而下求乎母也及擢筍冒土而上愛乎子也筍大約不過青綠色本草木性甲乙氣蘇子瞻云竹之始生一寸之萌耳陸農師云其萌曰筍筍从弓从日弓之日為筍解之日為竹一曰从旬旬內為筍旬外為竹今俗呼竹為妒母草言筍旬有六日而齊母其自死筍

謂之仙人杖

蒲箋云深蒲也傳云蒲弱也周禮醢入深蒲醢醢鄭  
司農云深蒲蒲弱入水深鄭玄云深蒲蒲始生水中  
子

言采其茆


茆與苕菜相似葉大如手赤圓有肥者著手中滑不得  
停莖大如七柄葉可以生食又可嚙滑美江東人謂之  
蓴菜或謂之水葵諸陂澤水中皆有

說文博雅俱云茆鳧葵也毛傳朱注亦同杜子春讀  
為卯許慎以泮宮詩讀之作力久切周禮醢人朝事  
之豆用茆菹注云茆鳧葵北人音柳鄭大夫又讀為  
芽謂茆初生者此不過方音各別耳爾雅翼云今萑  
小于苻陸璣所說則大于苻今萑自三月至八月莖  
細如釵股黃赤色短長隨水深淺名為絲萑九月十  
月漸麤硬十一月萌在泥中麤短名塊萑味苦澁取  
以為羹猶勝雜菜吳人嗜萑菜鱸魚蓋魚之美者復

因水菜以芼之兩物相宜獨為珍味然以鰾鱉為之  
更足生病陸德明云干寶曰今之鰾躠草堪為葅江  
東有之何承天曰此菜出東海堪為葅醬不可用鄭  
小同云江南人名之蓴菜生陂澤中草木疏同或又  
名水廢一云今之浮菜即猪蓴也本草有鳧葵陶弘  
景以入有名無用品解者不同未詳其正

按諸說則茆為鳧葵鳧葵為蓴無疑矣但本草以蓴  
又一物鳧葵即苽菜圖經又稱蓴葉似鳧葵殆亦以

鳧葵為荇菜歟



陸氏詩疏廣要卷上之上



欽定四庫全書

經部

陸氏詩疏廣要卷上之下

詳校官監察御史臣周

通政使司副使臣莫瞻菴覆勘

總校官知縣臣楊懋珩

校對官中書臣孫球

謄錄監生臣沈方大

欽定四庫全書

陸氏詩疏廣要卷上之下

吳陸璣撰

釋木

明毛晉廣要

薇蒂甘棠

甘棠今棠藜一名杜梨赤棠也與白棠同耳但子有赤  
白美惡子白色為白棠甘棠也少酢滑美赤棠子溢而  
酢無味俗語云澀如杜是也赤棠木理韌亦可以作弓  
幹

爾雅云杜赤棠白者棠郭云棠色異異其名樊光云  
赤者為杜白者為棠爾雅又云杜甘棠邢疏曰郭云  
今之杜梨舍人曰杜赤色名赤棠白者亦名棠然則  
其白者名棠其赤者為杜棠為甘棠杜為赤棠詩召  
南云蔽芾甘棠唐風云有杕之杜傳云杜赤棠是也  
鄭註云北人謂之杜梨南人謂之棠梨埤雅云字說  
詩言蔽芾甘棠以杜之美言有杕之杜以棠之惡孔  
子曰吾于甘棠見宗廟之敬也劉歆廟議以為思其

人尚愛其木況宗其道而毀其廟乎爾雅翼云每梨  
有十餘子唯一子生梨餘者生杜孫楚云梨有用為  
貴杜無用為賤括地志召伯廟在洛州壽安縣西北  
五里召伯聽訟甘棠之下周人思之不伐其樹後人  
懷其德因立廟有棠在九曲城東阜上通志云梨之  
類多杜甘棠謂之棠梨其花謂之海棠花其實謂之  
海紅子

按樊光云白者為棠赤者為杜陸氏以為白者甘赤

者澀則確乎棠美而杜惡矣字說相反之極豈因爾雅杜甘棠之說誤之耶或棠杜其總名但以赤白為美惡耳

標有梅

梅杏類也樹及葉皆如杏而黑耳曝乾為腊置羹臠齏中又可含以香口

夏小正云正月梅杏桃李則華五月煮梅為豆實郭璞云似杏實酢陸佃云梅在果子華中尤香俗云梅

花優于香桃花優于色故天下之美有不得而兼者  
多矣女失婚姻之時則感已之不如故詩人以標有  
梅興焉又詩曰墓門有梅有鴉萃止言墓門之隧既  
非梅之所宜生而鴉食甚而甘非梅之所能養猶之  
陳侂無良師傅養成其質以至于不義也今江湘二  
浙四五月之間梅欲黃落則水潤土溽礎壁皆汗蒸  
鬱成雨其霏如霧謂之梅雨沾衣服皆敗黥故自江  
以南三月雨謂之迎梅五月雨謂之送梅傳曰五月有

落梅風江淮以為信風亦花信風之類賈思勰曰梅花早而白杏花晚而紅梅實小而酸杏實大而甜梅可以調鼎否則不任此用世人或不能辨言梅杏為一物此則北人不識梅也書曰若作和羹爾為鹽梅七命云輝以秋橙酤以春梅正以春梅者實尚青味酢故也舊說大庾嶺上梅南枝已落北枝始花羅願云梅先春而花其實亦早古者以梅實荐饋食之邊所謂乾蘄是也蜀志曰蜀名梅為蘄大如雁子禮記疏

云嶺為乾梅說苑曰越使諸發執一枝梅遺梁王魏  
文帝與軍士失道大渴而無水遂下令曰前有梅林  
結子甘酸可以止渴西京雜記云漢初修上林苑羣  
臣各獻名果有朱梅紫花梅紫蒂梅同心梅丽枝梅  
燕梅侯梅范石湖云梅天下尤物無間智賢愚不肖  
莫敢有異議

按爾雅凡三釋梅俱非吳下佳品一云梅柟蓋交讓  
木也一云時英梅蓋雀梅似梅而小者也一云枕繫



梅蓋杭樹狀如梅子似小柰者也鍊脚道人和雪嚙  
之寒香沁入肺腑者迺是標有梅之梅爾雅獨未有  
釋文真一欠事范文穆公譜中所列種類甚多不能  
具載但綠萼梅紅梅蠟梅不可不辨至如梅龍盤園  
之奇古及重陽日錢塘江上折梅花觴詠有橫枝對  
筍開之句堪與廣平一賦並傳

唐棣之華

唐棣與李也一名雀梅亦曰車下李所在山中皆有其

花或白或赤六月中熟

一作成實

大如李子可食

爾雅云唐棣移郭註似白楊江東呼夫移

移音

鄭

註移楊也亦名扶移似白楊埤雅唐棣一名移其華

反而後合詩曰唐棣之華偏其反而豈不爾思室是

遠而子曰未之思也夫何遠之有此詩三百所以無

此篇歟凡木之花皆先合而後開惟此花先開而後

合詩曰山有苞棣隰有樹檎苞棣以況可與權之臣

樹檎以況可與立之臣可與權者在上可與立者在

下穆公之業也又曰何彼穠矣唐棣之華何彼穠矣  
華如桃李蓋棣華偏而後合桃李則皆有華之盛者  
故詩以況王姬下嫁其衣之穠如此爾雅翼云移生  
江南山谷其大十數圍無風葉動華反而後合所謂  
偏其反而者也又何彼穠矣之詩亦言唐棣之華此  
詩以王姬車服不繫其夫築館于外亦有反而後合  
之道至于執婦道以成肅雖則若桃李之相輝蔽不  
終反而已也崔豹古今註曰移楊圓葉弱蒂微風大

搖一名高飛一名獨搖又曰移楊一曰移柳亦曰蒲  
移而齊民要術以高飛獨搖為白楊之別名又本草  
白楊註云取葉圓大蒂小無風自動者故說者云葉  
無風自動此是移楊非白楊也蓋白楊多悲風又與  
此相類故相雜耳移皮焚為灰置酒中令味正經時  
不敗本草云扶移木皮味苦名物疏云唐棣常棣是  
二種爾雅云唐棣移本草謂之扶移木一名高飛一  
名獨搖爾雅又云常棣棣小雅所謂常棣之華也又

本草郁李仁一名棣一名雀李一名車下李七月之  
所謂奠也陸璣知唐棣常棣各一種却不當以名與  
李車下李五月成實者為唐棣故孔穎達七月疏俱  
不明了本草註于郁李仁下既引陸氏釋常棣之文  
圖經又引釋唐棣之文而常唐二字俱作棠混之甚  
矣唐棣自是楊類雖得棣名而實非棣也惟鄭漁仲  
分析甚當朱子論語註云唐棣郁李也亦陸璣誤之  
與

按鄭漁仲云郁李曰壽李曰車下李曰棣常棣詩云  
常棣之花鄂不韡韡據此說則直認常棣為唐棣矣  
何云漁仲分析甚當

### 樹之榛栗

榛栗屬有兩種其一種之皮葉皆如栗其子小形似杼  
子味亦如栗所謂樹之榛栗者也其一種枝葉如木蓼  
生高丈餘作胡桃味遼東上黨皆饒山有榛之榛枝葉  
似栗樹子似橡子味似栗枝莖可以為燭五方皆有栗

周秦吳揚特饒吳越被城表裏皆栗唯漁陽范陽栗甜

美長味

一作味長

他方者悉不及也倭韓國諸島上栗大如

鷄子亦短味不美桂陽有華栗叢生大如杼

一作杏

子中

仁

一作人

皮子形色與栗無異也但差小耳又有與栗皆

與栗同子圓而細或云即莘也今此

一本多色字

惟江湖有

之又有茅栗佳栗其實更小而木與栗不殊但春生夏  
花秋實冬枯為異耳

榛周禮籩人云饋食之籩其實榛說文云栗果實如

小栗榛木也曲禮云婦人之摯棋榛脯修棗栗棗  
榛似梓實如小栗栗屬也先王以為女摯賦云榛栗  
罇發江南有小栗謂之茅栗讀茅為茅誤也莊子曰  
狙公賦茅朝三而暮四衆狙皆怒茅小栗也爾雅翼  
榛枝莖如木蓼葉如牛李色高丈餘子如小栗其核  
中悉如李生則胡桃味膏燭又美亦可食噉漁陽遼  
代上黨皆饒鄭注禮曰榛似栗而小關中廊坊甚多  
然則其字從秦蓋此意也左傳曰女摯不過榛栗棗



修以告虔也稱告虔者榛有臻至之義栗有戰栗之義棗有早作之義修有修飭之義皆以其名告已之虔恭也又一種大小枝葉皆如栗其子形如杼子味亦如栗所謂樹之榛栗者其下云爰伐琴瑟是大木非榛楛之榛至女贄則宜兩者皆可用通志榛有三四種桌類也似桌而小正圓

栗大戴禮云八月栗零零也者降也零而後取之故不言剝也周禮天官云饋食之遵其實栗禮記內則

云栗曰撰之疏云栗蟲好食數數布陳撰省視之本  
草註云栗作粉勝于菱芡蜀本云樹高二三丈葉似  
櫟花青黃色似胡桃圖經云兗州宣州者最勝實有  
房彙若拳中子三五小者若桃李中子惟一二將熟  
則罅拆子出凡栗之類甚多詩云樹之華栗

華音  
臻

栗房當心一子謂之栗楔治血尤効陳士良云栗有  
數種其性一類三顆一毬其中者栗櫟也理筋骨風  
痛衍義曰湖北路有一種栗頂圓末尖謂之旋栗西

京雜記上林苑有侯栗、瑰栗、魁栗、榛栗、嶧陽栗、嶧陽都尉曹龍所獻大如拳，埤雅云：栗味鹹，北方之果也。有求蝟自襄東觀書曰：栗駭蓬轉，蓋今栗房秋熟，罅發其實，驚躍如暴去，根幹甚遠，所謂栗駭也。相法曰：白如截肪，黃如烝栗，今黃玉謂之栗玉，義蓋取此。爾雅：翼栗其實下垂，故從鹵。鹵者，草木實垂鹵鹵然，蓋象形也。古文桌從西從二鹵，徐巡說：木至西方戰栗，言木則凡木皆然，而栗至罅發之時將墜，不墜尤有

戰栗之象故天子五社西社植栗而宰我對栗社之  
義亦以為使民戰栗也栗之生極謹密三顆為房其  
房為蜩毛其中顆褊者號為栗楔尤益人大率栗味  
鹹性溫而宜於腎有患足弱者坐栗木下多食之至  
能起行其質縝密故稱玉質縝密以栗秦風阪有漆  
隰有栗燕秦千樹栗是其出處也秦饑應侯請發五  
苑之果蔬橡棗栗以活民昭王不許范子計然曰栗  
出三輔詩又云山有嘉卉侯栗侯梅侯助辭也西京

雜記稱漢上林苑中有侯栗又有侯梅此吳均之語  
不可取信廣要云有石栗其樹與栗同俱生於山石  
罅中花開三年方結實其殼厚而肉少其味似胡桃  
熟時或為羣鸚鵡所啄故彼人極珍貴之出日南又  
頻婆子者其實紅色大如肥阜核如栗煨熟食之味  
與栗無異

按許慎以栗為榛張揖又云辛栗也圖經陸疏又以  
莘為栗之一種可見草木形狀相似者其名亦易相

亂但棗字從辛從木責辛切音臻而廣雅作辛失木  
字本草及元恪諸家作莘從艸字至于陸佃云似梓  
直認為梓字點畫間毫釐千里誤人不小何六書之  
學累代莫問耶

梓椅梧桐

梓者楸之疎理白色而生子者為梓梓實桐皮曰椅今  
人云梧桐也則大類同而小別也桐有青桐白桐赤桐  
宜琴瑟今雲南牂柯人績以為布似毛布

梓椅爾雅云椅梓郭云即楸鄭云今亦謂之梓木良材也埤雅云舊說椅即是梓梓即是楸蓋楸之疎理而白色者為梓梓實桐皮曰椅其實兩木大類同而小別也今呼牡丹為花王梓為木王蓋木莫良于梓故書以梓材名篇禮以梓人名匠也爾雅翼云郭氏解椅梓云即楸又解楸榎云大而皴楸小而皴榎說文亦曰椅梓也梓楸也楸梓也櫝楸也然則椅梓楸櫝一物而四名定之方中既言椅又言梓故疏曰楸

之疎理白色而生子為梓梓實桐皮曰椅而齊民要  
術稱白色有角者為梓或名角楸又名子楸黃色無  
子者為柳楸世呼荊黃楸云然則是數者又以有子  
為辨耳梓為百木長室屋之間有此木則餘材皆不  
復震其莢細如箸其長僅尺冬後葉落而莢猶在樹  
總總然其實一名豫章古今註云棘實曰棗梓實曰  
豫章桑實曰椹柘實曰佳昔者伯禽康叔見周公三  
見而三筮遂見商子商子使觀于南山之陽見橋木



高而仰又使之觀乎北山之陰見梓焉晉然實而俯  
商子曰橋者父道也梓者子道也于是二子再見乎  
周公入門而趨登堂而跪周公拂其首勞而食之則  
以能子道焉耳雜五行書曰舍西種梓楸五令子孫  
順孝蓋亦此義日華子云椅樹皮有數般惟楸梓佳  
蕭炳云梓似桐而葉小花紫禮斗威儀云君乘火而  
王其政和平楸梓為長生通志略云梓與楸相似爾  
雅以為一物誤矣齊民要術云白色有角者為梓無

子為楸是皆不辨楸梓也梓與楸自異生子不生角  
梧桐爾雅云櫨梧郭云今梧桐鄭云以其可為棺櫨  
故曰櫨又云榮桐木郭鄭俱云即梧桐埤雅云梧一  
名櫨即梧桐也今以其皮青號曰青桐華淨妍雅極  
為可愛故齋閣多種之橐鄂皆五焉其子似乳綴其  
橐多或五六少或二三故飛鳥喜巢其中莊子所謂  
空闊來風桐乳致巢是也又云白桐華而不實冬結  
似子者乃是明年之花房爾雅云榮桐木是也謂之

華桐陶氏云桐有四種青桐葉皮青似梧而無子梧  
桐色白葉似青桐而有子白桐與岡梧無異唯有華  
子爾岡梧無子材中琴瑟者皆不足據按青桐即今  
梧桐白桐又與岡梧全異白桐無子材中琴瑟岡桐  
子大有油與陶氏之說正反爾雅翼云桐植物之多  
陰最可玩者青皮而白骨其生莢如箕子相對綴箕  
上成材之後可得實一石食之味如芡此木易生鳥  
銜墜者輒隨生歲可高一丈蓋有青赤白而青桐又

有有實無實之辨本草衍義云桐有四種白桐可斲  
琴者葉三枚開白花不結子荏桐早春先開淡紅花  
狀如鼓子花成筒子子作桐油梧桐四月開淡黃小  
花一如棗花枝頭出絲墮地成油霑漬衣履五六月  
結子今人取炒為果此是月令清明之日桐始華者  
岡桐無花不中作琴體重圖經云桐生桐柏山谷今  
處處有之其類有四種青桐梧桐白桐岡桐是也白  
桐一名椅桐又名黃桐岡桐似白桐惟無子或云今

南人作油者此桐亦有子頗大于梧子耳通志云桐之類亦多陶隱居云白桐岡桐俱堪作琴瑟據此說則白桐者梧桐也其材最大可為棺槨左傳云桐棺三寸爾雅云櫬是也註疏家不能別椅是岡桐桐是梧桐梓似楸別是一物爾雅謂之椅梓誤矣又有一種賴桐夏月繁花其紅如火又有紫桐花如百合又有刺桐其花側敷如掌枝幹有刺花色深紅又有一種實如甕子粟可作油陳藏器所謂甕子桐也賈思

魏曰桐有三輩青白之外復有岡桐即油桐也生于  
高岡蓋梧性便溼不生于岡故此桐有岡之號遁甲  
曰梧桐不生則九州異名之曰桐似本于此舊說梧  
桐以知日月正閏生十二葉一邊有六葉從下數一  
葉為一月有閏則生十三葉視葉小者則知閏何月  
論衡云楓桐速長故其皮肌不能堅桐譜云桐體溼  
則愈重乾則愈輕生時以斧斫之甚易乾乃軟而拒  
斧花木考云凡木本實而未虛惟桐反之試取小枝

削皆實堅其本皆中虛世所以貴孫枝者貴其實也  
實故絲中有木聲也嚴坦叔云陸璣言有青桐白桐  
赤桐此中琴瑟者白桐也椅桐梓漆之桐為白桐梧  
桐生矣之桐為青桐羅願云桐之中有數種有其子  
可以取油者蓋即詩所謂其桐其椅其實離離者也  
有華而不實堪作琴瑟者若生石間其聲則鳴書嶧  
陽孤桐是也雲南牂柯人績以為布其葉飼豕肥大  
三倍至秋後亦用以飼魚鄉人養魚者每春以草養

之頓能肥大秋後食以葉以封魚腹則不復食亦不復瘦以待春復食也齊地記曰城北十五里有桐臺即梧宮賈誼新書懸弧之禮東方之弧以梧梧者東方之草春木也南方之弧以柳柳者南方之草夏木也中央之弧以桑桑者中央之木也西方之弧以棘棘者西方之草秋木也北方之弧以棗棗者北方之草冬木也周書曰清明之日桐始華桐不華歲有大寒晉武帝時嘗得一石鼓擊之無聲張華取蜀桐材



刻魚形叩之音聞數里董仲舒請雨以桐魚九枚莫  
曉其義王逸子曰木有扶桑梧桐松柏皆受氣淳矣  
異于羣類者松柏冬茂陰木也梧桐春榮陽木也扶  
桑日所出陰陽之中也漢西域鄯善國有胡桐亦似  
桐蟲食其木則沫出其下流者俗名為胡桐淚言如  
目中淚也可以汗金銀俗語訛呼淚為律

按椅桐梓確是三種所謂大同而小別也但梧桐是  
一物爾雅雖兩釋實無異也蓋謂種類太多如青桐

白桐赤桐岡桐蘋桐紫桐荏桐刺桐胡桐蜀桐甕子  
桐之類不可枚舉其實各各不同諸家紛紛致辨轉  
致惑人至若陶氏謂白桐是岡桐鄭氏謂岡桐是椅  
桐益可笑矣

不流束蒲

蒲柳有兩種皮正青者曰小楊其一種皮紅正白者曰  
大楊其葉皆長廣似柳葉皆可以為箭幹故春秋傳曰  
董澤之蒲可勝既乎今人又以為箕籬之楊也

爾雅云楊蒲柳邢疏楊一名蒲柳生澤中可為箭筈  
左傳所謂董澤之蒲者杜註云董澤之蒲河東聞喜縣  
東北有董池鄭註楊蒲柳水楊也可為箭幹葉圓潤  
樹與柳相似故名楊柳采薇所謂楊柳依依左傳所  
謂董澤之蒲即此也埤雅蒲柳今有黃白青赤四種  
白楊葉圓青楊葉長赤楊霜降則葉赤材理亦赤黃  
楊木性堅緻難長俗云歲長一寸閏年倒長一寸重  
黃楊以其無火或曰以水試之則無火取此木必于

陰晦夜無一星則伐之為枕不裂楊之享甲早于衆  
木昏姻失時則曾木之不如也故詩曰東門之楊其  
葉牂牂牂牂盛也東門之楊其葉肺肺肺肺衰也以  
言嫁娶之莫如此莊子曰大聲不入于里耳折楊皇  
華則嗑然而笑折楊逸詩皇華即詩所謂皇皇者華  
是也易曰枯楊生華枯楊生稊蓋楊性堅勁雖生棟  
不撓齊民要術曰白楊性勁直堪為屋材寧折終不  
曲撓榆性懦軟久無不曲比之白楊不如遠矣毛傳

云蒲草也本草圖經云蒲柳其枝勁韌可為箭筈又謂之隹蒲即水楊也本草註云水楊葉圓濶而赤枝條短硬多生水傍古今註云蒲柳生水邊葉似青楊一名蒲柳枝勁細任矢用國策云夫楊樹之則生倒樹之亦生折而樹之又生世說顧悅云蒲柳之姿望秋而落詩緝云楊可為舟又可為屋材詩曰揚之水不流束蒲言激之水宜能浮泛而蒲又輕揚善泛今反不流如此則以水力更微而不勝故也列子曰虛

則夢揚實則夢溺之反也說者以為上章言薪言楚則蒲亦木名不宜為草誤矣夫芻亦草也而綢繆之詩乃曰束薪束芻束楚則豈以言木故妨草哉

無折我樹杞

舊刻集于  
苞杞非

杞柳屬也生水傍樹如柳葉麗而白色木理微赤故今人以為車轂今共北淇水傍魯國泰山汶水邊純杞也爾雅云旄澤柳邢疏柳生澤中者別名旄鄭註杞柳也生澤中如蘆荻可編為棖箱通志略云杞柳亦曰

澤柳可為栝橈者本草圖經云今人取其細條火逼  
令柔韌屈作箱篋河朔猶多

顏如舜華

舜一名木槿一名櫬一名曰椴齊魯之間謂之王蒸今  
朝生莫落者是也五月始花故月令仲夏木槿榮椴

爾雅釋草云椴木槿櫬木槿郭註云似李樹華朝生  
夕隕可食或呼日及一曰王蒸鄭註云即朝生莫落  
花也今亦謂之木槿一名椴一名櫬一名王蒸一名

舜華埤雅云華如葵朝生夕隕一名舜蓋瞬之義取  
諸此詩曰顏如舜華又曰顏如舜英言不可與久也  
蓋榮而不實者謂之英人物志曰草之精秀者為英  
獸之將羣者為雄張良是英韓信是雄篤論曰日給  
之華似柰柰實而日給虛虛偽之與真實相似也通  
志云爾雅入草例者樊光云其花朝生莫落與草同  
氣故在草中今人謂之朝生莫落人多植庭院間唐  
人詩云世事方看木槿榮言可愛易凋也亦可作籬



故謂之槿籬。傅玄云：舜花麗木也。或謂之洽容。或謂之愛老成。公綏云：日及華甚鮮茂，榮于孟夏，訖于孟秋。廣雅云：一名朱槿，一名赤槿。爾雅：翼云抱朴子曰：夫木槿、楊柳，斷植之更生，倒之亦生，橫之亦生，生之易者，莫過斯木也。仲夏應陰而榮，月令取之，以為候其花朝開，莫落，或呼為日及。陸機賦云：如日及之在條，常雖盡而不悟。潘尼云：朝菌者，詩人以為舜華，莊生以為朝菌。詩曰：有女同車，顏如舜華。又曰：顏如舜英。舜蓋華。

之茂者又枝葉相當有同車之象亦如舜朝開日莫落少過時則後之矣太子忽當有功于齊之時可以取齊女于是時而不取則若日及之不可待矣木槿作飲令人得瞑與榆同功其花用作湯代茗可以治風然茗令人不睡木槿令人睡為異爾本草衍義云木槿如小葵花淡紅色五葉成一花朝開暮斂花與枝兩用湖南北人家多植為籬障傅咸賦云應青春而敷蘂逮朱夏而誕英布天天之織枝發灼灼之殊

榮紅葩紫蒂翠葉素莖含暉吐曜爛若列星

山有樞

樞其鍼刺如柘其葉如榆淪為茹美滑于白榆榆之類  
有十種葉皆相似皮及木理異爾

爾雅云樞莖

樞音歐莖大結反

邢疏云別二名也郭云今

之刺榆詩唐風云山有樞是也鄭註云刺榆也有  
鍼刺如柘其葉如榆洵為蔬美滑于白榆爾雅翼  
詩山有樞隰有榆樞莖蓋榆之類今之刺榆也爾雅

疏榆之類有十種葉皆相似皮及木理異耳而刺  
榆有鍼刺如柘其葉如榆淪為蔬美滑于白榆內  
則曰董豈粉榆免蕘滌髓以滑之

蓋榆之類皆滑  
免讀若問孫恂

唐類苑新生草則蕘乃是久者以  
上四物新舊之名皆滑利之名也嵇康謂榆令人

瞑齊民要術稱桺榆凡榆三種色別種之勿雜  
以為桺榆莢葉味苦凡榆莢味甘甘者春時  
將煮賣是以須別也廣志曰有姑榆有郎榆  
郎榆無莢管子五粟五沃之土其榆條直以長

按陳藏器云江南有刺榆無大榆蓋大榆北方有之秦漢故塞其地皆榆塞榆北方之木也淮南子曰槐榆與橘柚合而為兄弟有苗與三危通而為一家言槐榆北方橘柚南方也是以江南無榆但言樞耳若晉風則山隰兼有之然而有材不能用則不如其亡也汜勝之書曰三月榆莢南時高皆強土可種木漢鑄莢錢如榆莢也又豐有枌榆社崔寔四民月令曰榆莢成者收乾以為青蓄色變白將落

收為醬河平元年旱傷麥民食榆皮萬畢術曰八月  
榆櫨令人不飢廣雅云柘榆梗榆也陳藏器云江南  
有刺榆無大榆刺榆秋實

### 山有栲

栲葉似櫨木皮厚數寸可為車輻或謂之栲櫨許慎正  
以栲讀為櫨今人言栲失其聲耳

爾雅云栲山櫨邢疏云舍人曰栲名山櫨郭云栲似  
櫨色小白生山中因名云亦類漆樹俗語曰櫨櫨栲

漆相似如一詩唐風云山有樗陸璣疏語云山樗與下  
田樗略無異葉似差狹耳吳人以其葉為茗方俗無  
名此為栲者誤也今所云為栲者葉如櫟木皮厚數  
寸可為車輻謂之栲櫟許慎正以栲讀為稊今人言  
栲失其聲矣鄭註云山樗似栲而葉差狹栲木葉似  
椿江東呼為虎目葉脫處有痕如栲蒲子又如眼目  
按疏云許慎讀栲為稊應作稊讀丘上聲故與杻叶  
南山有臺亦與杻叶

隰有杻

舊刻山有杻非

杻櫪也葉似杏而尖白色皮正赤為木多曲少直枝葉茂好二月中葉疏花如棟而細蕊正白蓋樹今官園種之正名曰萬歲既取名于億萬其葉又好故種之共汲山下人或謂之牛筋或謂之櫪材可為弓弩幹也

爾雅云杻櫪郭氏註云似棣細葉葉新生可飼牛材中車輞闕西呼杻子一名土樞鄭氏註云俗呼牛筋木其材堅韌中車輞及弓弩



椒聊之實

椒聊聊語助也椒樹似茱萸有鍼刺莖葉堅而滑澤蜀人作茶吳人作茗皆合煮其葉以為香今成皋諸山間有椒謂之竹葉椒其樹亦如蜀椒少毒熱不中合藥也可著飲食中又用蒸雞豚最佳香

一作者

東海諸島上

亦有椒樹枝葉皆相似子長而不圓甚

一作其

香其味

似橘皮島上麋鹿食此椒葉其肉自然作椒橘香也

爾雅云檄大椒邢疏云檄者大椒之別也郭云今椒

樹叢生實大者名為檄詩唐風云椒聊且鄭註云檄  
大椒秦椒也與蜀椒相似稍大而香氣減焉俗呼膠  
子爾雅又云椒檄醜菜疏云椒檄之類實皆有菜彙  
自裏李巡曰椒菜萇皆有房故曰菜菜實也郭云菜  
萇子聚生成房貌今江東亦呼菜椒似菜萇而小赤  
色鄭云此類結子成穗彙埤雅椒似菜萇而小赤  
內含黑子如點今謂椒目木有鍼刺葉堅而滑澤爾  
雅曰椒檄醜菜桃李醜核言桃李屬皆內核椒檄屬

皆外菜也酉陽雜俎曰椒可以來水銀菜莢氣好上  
椒氣好下蓋椒氣性不上達故詩以譬沃也言沃盛  
強能修其政然其馨香下達而已詩曰椒聊之實蕃  
衍盈升椒聊之實蕃衍盈朶沃以支子受邑其後遂  
將盛大則猶之椒也其實蕃衍而至於盈升盈朶也  
莊子曰韋以裒椒雖踰絺綌然久則臭故天下之理  
有初雖若佳後更為害不可不察也爾雅翼椒實多  
而香故唐詩以椒聊喻曲沃之蕃衍盛大聊語助也

陳詩貽我握椒周頌有椒其馨離騷云雜申椒與菌  
桂懷椒糝而要之九歌云奠桂酒兮椒漿播芳椒兮  
成堂漢世皇后稱椒房取其實蔓延盈升以椒塗屋  
亦取其溫暖故長樂宮有椒房殿其後董賢女弟為  
昭儀居舍與后相擬風及晉世石崇王愷之徒相矜  
以富於是崇以椒為泥泥其屋而愷以赤石脂泥其  
壁云荆楚之俗正月一日長幼悉正衣冠以次拜賀  
進椒酒崔實月令云過臘一日謂之小歲拜賀君親

進椒酒從小起成公綏椒花銘云肇惟歲首月正元  
日是知小歲則用之漢朝元正則行之後世率以正  
月一日以盤進椒飲酒則撮寘酒中號椒盤焉然椒  
亦能殺人故漢李咸欲爭竇后配桓帝擣椒自隨而  
齊建武中欲併誅高武子孫令太醫煮二斛椒熟則  
一時賜死此其事春秋運斗樞曰玉衡星散為椒山  
海經曰琴鼓之山其木多椒孝經援神契曰椒薑櫛  
涇昌蒲益聰蜀都賦丹椒爾雅以檄為大椒謂叢生

實大者又曰椒檛醜菜菜萸子聚生成房貌今江東  
亦呼菜云樹有鍼刺葉堅而滑澤每葉中亦有刺蜀  
人作茶吳人作茗皆煮其葉以為香又東海諸島上  
有椒子長而不圓其味如橘皮島上麋鹿食此葉者  
其肉自然作椒橘香范子計然曰蜀椒出武都赤色  
者善秦椒出天水隴西細者善通志椒曰唐菰曰陸  
機曰南椒生于漢中者曰漢椒蜀中者曰蜀椒巴中  
者曰巴椒

按爾雅云枅者聊郭氏鄭氏雖俱云未詳然聊為木無疑矣或者木之糾曲者名聊烏知椒聊之聊非即枅者聊耶但向來諸家俱作助語辭不敢妄解

集于苞栢

栢今作櫟也徐州人謂櫟為杼或謂之為栢其子為阜或言阜斗其殼為汁可以染阜今京洛及河內多言杼斗或云櫟斗謂櫟為杼五方通語也

爾雅云栢杼郭註作樹鄭註栢作木今人以為梳木

草云橡實堪染用一名杼斗榘櫟皆有斗以櫟為勝  
所在山谷中皆有圖經云木高二三丈三四月開黃  
花八九月結實柞櫟也杼也榘也皆橡櫟之通名枕  
中記曰橡子非果非穀最益人服食無氣而受氣無  
味而受味消食止痢令人強健本草衍義云櫟葉如  
栗葉堅而不堪充材風土記云吳越之間名柞為櫟  
古今註云杼實曰橡東海及徐州謂之木蓮其葉始  
生食之味辛其椹子八月中成搏以為燭明如胡麻



燭研以為羹肥如胡麻羹

有條有梅

條稻也今山楸也亦如下田楸耳皮葉白色亦白材理好宜為車板能濕又可為棺木宜陽共北山多有之梅樹皮葉似豫章豫章葉大如牛耳一頭尖赤心花赤黃子青不可食枏葉大可三四葉一叢木理細緻于豫章子赤者材堅子白者材脆荊州人曰梅終南及新城上庸皆多枏終南與上庸新城通故亦有枏也

條爾雅云槲山榲李巡曰山榲一名槲郭云今之山  
楸秦風云終南何有有條有梅是也鄭云山楸也其  
材有文綴中車板樂器盤合用爾雅又云柚條郭註  
云似橙實酢生江南邢疏云禹貢揚州云厥苞橘柚  
孔安國云小曰橘大曰柚呂氏春秋云果之美者有  
雲夢之柚本草唐本註云柚皮厚味甘不如橘皮味  
辛而苦其肉亦如橘有甘有酸酸者名胡甘今俗人  
或謂橙為柚非也鄭註云條今謂之柚似橘而大皮

瓢厚埤雅云柚似橙而大于橘一名條秦風所謂有條者是也碧幹丹實出于江南列子曰吳楚之國有大木焉其名為櫟食其皮汁已憤厥之疾度淮而北化為枳焉故曰橘柚凋于北徙若榴鬱于東移也

梅爾雅云梅枏郭云似杏實酢孫炎云荊州曰梅揚州曰枏詩秦風云有條有梅是也埤雅云梅至北方多變而成杏故人不識梅者地氣使然也詩曰終南何有有條有梅君子至止錦衣狐裘條柚也蓋柚

渡淮而為枳梅變而成杏今終南之所生有條有梅而材實成焉以譬人君之道化也爾雅翼云枏大木也可以為舟又可以為棺故古稱梗楠豫樟以為良木之類任昉云黃金山有枏木一年東邊榮西邊枯一年西邊榮東邊枯張華云交讓木宋子京云讓木即枏也其木直上柯葉不相妨蜀人號讓木名物疏云按陸璣所釋梅自是枏木似豫樟者豫樟大樹所謂生七年而可知可以為棺舟者也陳文帝嘗出枏

材造戰艦卽此枿也若今之所謂梅乃古和羹之梅  
籩實之乾蓀郭璞云似杏實酢者也若爾雅之梅枿  
乃陸云似豫章者景純不當以似杏實酢解之草木  
同名異種者甚多如山榎名條柚亦名條豈可以上  
文之條為柚耶朱傳于標有梅既具釋此章不復云  
似合二梅為一矣

按條是稻梅是枿爾雅與陸疏甚合此篇乃秦人誇  
美其君之詞借巨材以起興若陸農師指條為柚指

梅為杏取渡淮變化之義益無謂矣今併錄之以見其誤釋梅一條已詳標有梅篇中

山有苞櫟

苞櫟秦人謂柞為櫟河內人謂木蓼為櫟椒櫟之屬也其子房生為棣木蓼子亦房生

爾雅云櫟其實棣郭云有棣暈自裏疏云櫟似櫟之木也棣盛實之房也孫炎曰櫟實椽也璣疏云秦人謂柞為櫟故說者或曰柞櫟或曰木蓼璣以為此秦

詩也宜從其方土之言柞櫟是也鄭註亦謂之椽一名阜斗其實作椽似栗實而小爾雅翼管子五粟之土其柘其櫟條直以長淮南時則訓十二月之木正月其木楊楊蒲柳也楊木春先二月其木杏有竅在中象陰布散在上三月其木李李亦有核李後杏熟故主三月四月其木桃說與杏同桃後李熟故主四月五月其木榆六月其木梓說未聞七月其木棟棟實鳳凰所食今雒城旁有樹棟實秋熟八月其木柘

未聞九月其木槐槐懷也可以懷來遠人十月其木  
檀檀陰木也十一月其木棗取其赤心也十二月其  
木櫟櫟可以為車轂木不出火唯櫟為然亦應陰氣  
也莊子匠石見櫟社樹其大蔽牛絜之百圍上林賦  
註應劭曰櫟采木也顏師古以為木蓼葉辛初生可  
食通志櫟曰橡亦曰櫟其實作椶曰阜斗曰橡斗然  
有二種南土多櫟北土多櫟爾雅釋木云櫟其實椶  
詩秦風云山有苞櫟並此也其釋木云栲杼與唐風



云集于苞相並是柞木而陸璣誤謂是此耳橡實之類極多大體皆桌屬也可食有似栗而圓者大小有三四種周禮籩人所謂棹實是也二三實作一棹正似桌而小者大小有三四種爾雅所謂栲栳是也註云子如細桌江東人亦呼為栲栳今俗謂之為茅桌猴桌柯桌皆其類也或曰櫟之實似櫟而小不可食隰有樹櫟

櫟一名赤

一作離

一名山梨今人謂之楊櫟其實畧如

梨但實甘小異耳一名鹿梨一名鼠梨齊郡廣饒縣堯  
山魯國河內共北山中有今人亦種之極有脆美者亦  
如梨之美者

爾雅云樾羅郭註云今楊樾也實似梨而小酢可食  
鄭註云山梨也埤雅云樾一名羅其文細密如羅故  
曰羅也又有白者赤羅文棘白羅文緩雖皆所謂文  
木然而赤羅為上秦詩初曰晨風卒曰樹樾者言人  
君所以用賢之道始於能致之終於能立之棟謂之

綾衫謂之紗縠謂之羅羅亦有華者俗謂之羅錦羅  
錦猶言杉錦棟綾也羅錦明杉錦暗今虜人有棟綾  
器其文如綾綺狀又下於杉錦矣

六月食鬱及蓂

舊刻缺六月二字

鬱其樹高五六尺其實大如李色正赤食之甘

毛詩云鬱棣屬蓂蓂也孔疏云鬱是唐棣之類劉  
棖毛詩義問云其樹高五六尺其實大如李正赤食  
之甜與棣相類故云棣屬蓂蓂者亦是鬱類而小別

耳晉宮閣銘云華林園中有車下李三百一十四株  
奠李一株車下李即鬱奠李即奠二者相類而同時  
熟故言鬱奠也本草圖經云郁李木高五六尺枝條  
葉花皆若李惟子小若櫻桃赤色而味甘酸核隨子  
熟六月採根并實取核中人用名物疏云奠一名郁  
李一名奠李一名嬰李一名燕奠一名棣一名爵李  
一名車下李廣雅謂之奠古與鬱俱棣屬也故同得  
車下李之名陸璣以唐棣為奠李非也而以為實大

如李則得之本草圖經謂郁李子如櫻桃則似說常棣非郁李也郁李雖棣屬然非爾雅所謂唐棣常棣也古之說者惟不知唐棣為扶移木而以為萸又不知萸別是一種而以為常棣故本草注及詩緝諸說俱誤今由陸璣崔豹鄭樵及本草諸說參詳之始知其別如此魏王花木志云燕萸實如龍眼黑色說文謂之萸萸詩疏一名車鞅藤曲詩六月食萸者此也廣志曰燕萸似梨早熟據此又非郁李而二說亦相

矛盾殆不足取證韓詩萸字又作藿是爾雅所謂藿  
山韭者非毛詩之萸爾雅翼云山韭形性與韭相類  
但根白葉如燈心苗

按陸疏題列二物止釋一物者如榛櫟濟濟止釋櫟  
六月食鬱及萸止釋鬱之類是也豈以萸即是唐棣  
故存而不論耶其實常棣與唐棣與鬱與萸原是四種  
毛氏云鬱棣屬則非棣可知孔氏云萸鬱類則非鬱  
可知馮嗣宗辨之甚詳但燕萸萸舌是草大概與下

文葵相似恐不應與木類相混

采茶薪樗

樗樹及皮皆似漆青色耳其葉臭

本草樗木根葉尤良唐本註云二樹形相似樗木疎  
椿木實為別也蕭燾云樗俗呼為虎眼樹本經椿木  
殊不相似圖經云椿樗二木形幹大抵相類但椿實  
而葉香可噉樗木疎而氣臭膳夫亦能熬去其氣北  
人呼樗為山椿江東人呼為鬼目葉脫處有痕如樗

蒲子又如眼目故得此名其木最為無用莊子所謂  
吾有大木人謂之樗其本擁腫不中繩墨小枝曲拳  
不中規矩立于途匠者不顧是也俗語云樗櫟漆  
相似如一衍義云世以無花不實木身大其榦端直  
者為椿椿用木葉莢故曰未見椿上有莢者又有樗雞  
為樗櫟用根葉莢故曰未見椿上有莢者又有樗雞  
故知古人命名曰不言椿雞而言樗雞者以顯有雞  
者為樗無雞者為椿



常棣之華

常棣許慎曰白棣樹也如李而小如櫻桃正白今官園種之又有赤棣樹亦似白棣葉如刺榆葉而微圓子正赤如郁李而小五月始熟自關西天水隴西多有之

爾雅云常棣棣郭註今關西有棣樹子如櫻桃可食鄭註郁李也埤雅常棣如李而小子如櫻桃正白華萼上承下覆甚相親爾采薇所謂彼爾維何維常之華是也唐棣之華反而後合詩以譬權則此華上承

下覆甚相親爾者常而已矣故曰常棣也移从移棣  
从隶隶言華萼相承輝榮相隶也隶仁也移義也兄  
弟尚親親親仁也故常棣以燕兄弟傳曰聞常棣之  
言為今也聞常棣之言為今則管蔡之所以失道者  
以不聞乎此而已故序曰閔管蔡之失道故作常棣  
焉左傳曰周公弔二叔之不咸糾合宗族于成周而  
作詩曰常棣蓼子曰作人當如常棣灼然光發程子  
曰今玉李也華萼相承甚力

南山有枸

南山舊  
刻北山

枸樹山木其狀如櫨一名枸骨高大如白楊所在山中皆有理白可為函板枝柯不直子著枝端大如指長數寸噉之甘美如飴八九月熟江南特美今官園種之謂之木蜜古語云枳枸來巢言其味甘故飛鳥慕而巢之本從南方來能令酒味薄若以為屋柱則一屋之酒皆薄

宋玉賦曰枳枸來巢謂枸木多枝而曲所以來巢也

本草枳椇一名木蜜以木為屋屋中酒則味薄註云  
昔有南人修舍用此木悞有一片落在酒甕中其酒  
化為水味唐本註云其樹徑尺木名白石葉如桑柘  
其子作房似珊瑚核在其端埤雅云椇木高大似白  
楊子依房生著枝端大如指長數寸噉之甘味如飴  
今俗謂之枳椇古今註一名樹蜜一名木饒實形卷  
曲核在實外一名白石白實木石木實爾雅翼古者  
人君燕食所加庶羞凡三十一物椇其一也又婦人

之贅棋榛棗栗荆楚之俗亦鹽藏荷裹以為冬儲今  
不以為重賤者食之而已明堂位四代之俎商以棋  
盞俎足橫木為曲撓之形如棋枳之枝也今人謂之  
枳枸又謂之蜜曲錄荀子枸木必待櫟括柔矯然後  
直廣志云葉似蒲柳子十一月熟樹乾者益美或云  
果名一名白石李通志枳棋蜀人謂之枸詩緝云疏  
引宋玉賦枳棋來巢以證毛說然風賦字作枳句李  
善註云橘踰淮為枳句曲也句音溝非毛義也

北山有楸

楸楸屬其樹葉木理如楸山楸之異者今人謂之苦楸濕時脆燥時堅今永昌又謂鼠梓漢人謂之楸

爾雅云楸鼠梓郭云楸屬也今江東有虎梓鄭云苦楸也圖經云鼠梓一名楸亦楸之屬也詩小雅云北山有楸是也鼠李一名鼠梓或云即此也然鼠梓花實都不相類恐別一物而名同也曹氏云宮室之良材通志畧云鼠李曰牛李曰鼠梓曰棹曰山李曰楸

曰苦楸即烏巢子也

爰有樹檀

檀木皮正青滑澤與繫迷相似又似駁馬駁馬梓桼其樹皮青白駁瑩遙視似馬故謂之駁馬故里語曰斫檀不諦得繫迷繫迷尚可得駁馬繫迷一名挈盭故齊人諺曰上山斫檀挈盭先殫下章云山有枹隸隸有樹極皆山隰之木相配不宜謂獸

傳曰檀彊韌之木論衡曰楓桐之樹生而速長故其

皮肌不能堅剛樹檀以五月生葉後被春榮之木其材強勁車以為軸淮南子十月檀檀陰木也爾雅云魄榲榼郭註魄大木細葉似檀今河東多有之齊人諺曰上山斫檀榲榼音系先殫鄭註按此俗呼朴樹其木如檀子大如梧桐子而黃

按朱註檀木已詳盡矣陸疏特辨其似而非者耳今併載爾雅郭鄭二家註以備隲有六駁參考但挈榼爾雅作榲榼



其下維穀

穀幽州人謂之穀桑或曰楮桑荆揚交廣謂之穀中州人謂之楮殷中宗時桑穀共生是也今江南人績其皮以為布又擣以為紙謂之穀皮紙長數丈潔白光輝其裏甚好其葉初生可以為茹

博雅云穀楮也稗雅穀惡木也而取名于穀者穀善也惡木謂之穀則甘草謂之大苦之類也本草曰楮一名穀陶氏云即今構木誤矣先賢以為皮斑者是

楮皮白者是穀有辯者曰楮無辯者曰構按此非一  
種物類相感志云其膠可以團丹砂語曰構膠為金  
石之漆是也列子曰宋人有為其君以玉為楮業者  
三年而成亂之楮葉中不可別也遂以巧食宋國列  
子聞之曰使天地之生物三年而成一葉則物之有  
業者寡矣故聖人恃道化而不恃知巧爾雅翼穀易  
生之物一說穀田久廢則生穀其實正赤如楊梅而  
無核伊陟相太戊毫有祥桑穀共生于朝傳曰俱生

于朝七日而大拱伊陟戒以修德而木枯劉向以為  
桑喪也穀猶生也殺生之柄失而在下則是以桑穀  
為二物也而陸璣以為穀幽州人謂之穀桑或曰楮  
桑然則蓋一物也廣州記曰蠻夷取穀皮熟槌為揭  
裏布鋪以擬氈南山經曰招搖之山有木焉其狀如  
穀而黑裏其華四照其名曰迷穀佩之不迷本草圖  
經云楮有二種一種皮有斑花文謂之斑穀今人用  
為冠一種皮無花但葉似葡萄作瓣而有子者為佳

其實初夏生如彈丸青綠色至六七月漸深紅色乃成熟八月九月採抱朴子云杼實赤者餌之一年老耆還少通志云楮亦謂之穀其實入藥其皮造紙濟世之用也桑穀共生者即此

### 蔽芾其樗

山樗與下田樗略無異葉似差狹耳吳人以其葉為茗李氏曰樗者不材之木也莊子云吾有大樹人謂之樗其大枝擁腫不中繩墨其小枝卷曲不中規矩

按檇似栲似椿陸疏辨之甚明檇又有山檇下田檇  
稍別此章與采茶薪檇皆下田一種所謂不中繩墨  
規矩者也詳見七月篇

無浸獲薪

舊刻  
獲非

獲今柳榆也其葉如榆其皮堅韌剝之長數尺可為絙  
索又可為甌帶其材可為杯器

爾雅云獲落邢疏云獲一名落某氏曰可作杯圈皮  
韌繞物不解郭云可以為杯器素素謂樸也小雅大

東云無浸穫薪鄭箋云穫木名鄭註云郭云可以為  
杯器據此則今檉杉

按鄭漁仲通志略曰穫郭云可以為杯器素此赤檉  
也但檉是柳屬穫是榆屬恐非一類 又按大東篇  
穫字从禾與八月其穫穫字同故毛朱傳及呂嚴諸  
家俱云刈也今爾雅陸疏俱釋木名从木確與本章  
無涉

隰有杞桋

棟葉如柞皮厚而白其木理赤者為赤棟一名棟白者為棟其木皆堅韌今人以為車轂

爾雅云棟赤棟白者棟郭云樹葉細而岐銳皮理錯

戾好叢生山中中為車輞白棟葉圓而岐為大木邢

云棟赤者名棟白者即名棟某氏曰其色雖異為名

即同鄭云棟赤棟白者棟俗呼斤木叢生可作藩籬

大者任車輞

棟山  
厄反

江河間棟可作鞍

榛楷濟濟

楷其形

一作莖

似荆而赤莖

一作葉

似著上黨人織

一作

蔑以為斗筭箱器又揉

一作屈

以為釵故上黨人調

問婦人欲買楮否曰竈下自有黃土問買釵否曰山中自有楮

禹貢云荊州貢楮註云中矢幹出雲夢之澤爾雅翼  
楮堪為矢其莖似荆而赤其葉如著古者楮矢則石  
為之弩說者以榛可為贅為文事楮可為矢為武事  
是蓋不然夫榛楮皆用之武事說文榛木也一日散



也。故蓋矢之善者，春秋傳所謂致師者，左射以蔽是也。若楛則為矢甚明。周世修后稷公劉之業，而申以百福千祿，皆文事也。然不可無武備，故瑟彼玉瓚，以下述文治之美。而首章言武備也。周語曰：夫旱麓之榛楛殖，故君子得以易樂千祿焉。若夫山林匱竭，林鹿散亡，藪澤肆竭，民力凋盡，田疇荒蕪，資用乏匱，君子將險哀之不暇，而何易樂之有？是先有險哀之備，而後可以及易樂也。顏監曰：楛，木堪為箭筈。今幽以

北皆用之土俗呼其木為楷子有隼集于陳庭而死  
楷矢貫之石砮其長尺有咫問諸仲尼仲尼曰隼來  
遠矣此肅慎氏之矢也昔武王伐商封異姓以遠方  
之職貢使無忘服故以楷矢封陳使求諸故府果得  
之夏書荊州之貢礪砥砮丹惟箛簞楷則夫楷矢石  
砮者中州職貢之常也今仲尼獨以遠方之貢為驗  
豈三代之際職貢不同或者不妨中國自有之特其  
長有咫者為肅慎之物歟

其灌其樹

桺桺葉如榆也木理堅韌而赤可為車轅

爾雅云桺桺郭註樹似榭檟而庫小子如細栗

一作栗

可食今江東亦呼為桺栗

一作栗

鄭註桺桺

音例而

茅栗也內則云芝桺菱棋鄭氏云人君燕食所加

庶羞也通志云橡實之類極多有似栗而小者大小

有三四種爾雅所謂桺桺是也註云子如細栗江東

人亦呼為桺栗今俗謂之為茅栗猴栗柯栗皆其

類也

按栴亦栗屬故可作人君庶羞必當以漁仲之說為  
正向坊刻爾雅云子如細栗江東呼為栴栗俱从米  
不從木誤矣

其櫟其楮

櫟河柳生水旁皮正赤如絳一名雨師枝葉似松楮積  
節中腫可作杖以扶老今靈壽是也今人以為馬鞭及  
杖弘農共北山甚有之

檉爾雅云檉河柳郭註今河旁赤莖小楊鄭註殷檉也生水畔其葉經冬變紅爾雅翼檉葉細如絲婀娜可愛天之將雨檉先起氣以應之故一名雨師而字從聖字說曰知雨而應與于天道木性雖仁聖矣猶未離夫木也小木既聖矣仁不足以名之音頽則赤之貞也神降而為赤云檉非獨能知雨亦能負霜雪大寒不彫有異餘柳詩皇矣云作之屏之其苗其翳修之平之其灌其柶啟之辟之其檉其楮攘之剔之

其壓其柘蓋文王之養材于山林日就繁茂故其始而屏除之也始于已死之留翳而及于龐雜之灌樹又及于檉据之小材又不得已而及于壓柘之良木以明草木逾茂則始之所愛者不能並育以漸去焉故其卒至于柞楸斯拔松柏斯兑也然則檉亦良木矣漢書鄯善國多檉柳段成式云赤白檉出涼州大者為炭復入灰汁可以煮銅南都賦註檉似柏而香今檉中有脂號檉乳本草衍義云人謂三春柳以其

一年三秀也。花肉紅色，成細穗。河西者，戎人取滑枝，  
為鞭。通志云：檉曰河柳，曰雨師。曰春柳，本草謂之赤  
檉木，以其材赤故也。大槩松杉之類，而意態似柳，故  
謂之檉柳。其材可卷為盤，合又曰櫟落。郭云：可以為  
栝，器素此赤檉也。又有一種名赤楊，又名水楊，與此  
相似，而植之水邊，其葉經秋盡紅，人多植于門巷，杜  
詩：「紅檉曉夜希」，即此也。

据爾雅云：「据櫟，郭註：腫節可以為杖。」鄭註：按此木似藤。

節目相對今人以為杖甚奇爾雅翼云梲櫝也草木  
疏云節腫似扶老即今靈壽是也今人以為馬鞭  
漢書孔光傳賜靈壽杖孟康曰扶老杖師古曰木似  
竹有枝節長不過八九尺圍三四寸自然有合杖制  
不須削治也山海經云廣都之野靈壽實華王粲頌  
云寄幹堅正不待矯揉陳藏器云生劍南山谷圓長  
皮紫作杖令人延年益壽

柞械拔矣



柞械三蒼說械即柞也其材理全白無赤心者為白

桲直理易破可為犢車軸

一作犢車輻

又可為矛戟鍛

一作

矜


爾雅云械白桲郭註小木叢生有刺實如耳璫紫赤可啖鄭註即山柞也爾雅翼柞生南方葉細而密今人為梳用之詩雅道柞為尤多方周之興大妣夢商之庭產棘小子發取周庭之梓植之于闕間梓化為松柏柞械覺驚以告文王文王曰勿言冬日之陽夏

日之陰不召而物自來以為宗周興王之兆故詩曰  
帝省其山柞棫斯拔松柏斯兌帝作邦作對自太伯  
王季未必不謂此也又述文王之事曰柞棫拔矣山  
木多矣而獨言柞棫蓋柞民之所燎且至于聳拔則  
其餘可知也齊民要術稱柞斫去尋生料理還復蓋  
良木之易成者然亦非人力料理有不可復此以見  
太王之勤也又言柞宜種于山阜之曲十年中椽二  
十年中屋椽柴在外然則為利亦博矣通志柞木曰

械曰桷曰杼爾雅云桷杼詩析其柞薪又曰柞械斯  
拔陸璣云三蒼云械即柞也其葉繁茂其木堅韌有  
刺今人以為梳亦可以為車軸嚴粲云柞櫟也即唐  
風鵲羽所謂桷也

據陸氏釋柞械與唐風集于苞桷之桷秦風山有苞  
櫟之櫟一物也秦人謂柞為櫟徐州人謂櫟為桷不  
過方言或異耳嚴華谷亦云然但鄭漁仲謂桷杼為  
柞謂櫟為榦別是一種本草又以榦櫟稍有差別朱

子解柞云枝長葉盛叢生有刺却與櫟葉如栗葉者  
不同況柞十年中椽二十年中屋而朱子解械云小  
木叢生有刺何相去之遠耶可見械是小木所謂無  
赤心實如耳璫者是也柞櫟櫟是大木所謂栗屬樹  
大蔽牛者是也但鄭氏認械是山柘恐未必然



陸氏詩疏廣要卷上之下